

二十四史輯要

冊一



翁松禪相國尺牘真蹟

連史紙十二冊  
布面一函六元

常熟翁相國。文章書法。照耀當世。然至精之品。尤以掌中樞時致閣丹初相國譚文卿制軍爲最。不特異於晚年頽唐之筆。且所言皆有關於當時掌故。未附致汪柳門侍郎書一冊。係林下往來之牘。筆墨雋永。又有草稿數種。均與尋常酬應文字大不相同。全稿十二冊。用金屬版精印。與原蹟不爽累黍。

中 華 書 局 發 行

# 二十四史輯要凡例

一 二十四史卷帙浩繁讀者每望而却步本書爲便利讀者起見將全史中最要之篇採入計凡二百餘篇讀者儘此書畢業已可得列代史事之概要若因此引起研究之興味由幹尋支由支尋葉則搜及全史亦較尋常循序讀全史者事半功倍且可以脈絡貫通不致枯燥無味

二 所選各篇除可自成篇章者外概錄全文不敢割裂一則存原書之精神一則欲將全史加以刪節非大才莫辦輯者學識有限不敢妄爲

三 此書旣以輯要爲旨故輯取時恆以下列各條爲標準

(甲) 每代之事只取極有關係者列入

(乙) 有甲篇之事實乙篇已能舉其要者則採乙而棄甲不並存

(丙) 當羣雄並起及同時建立功業者只取一二人爲代表不徧列

(丁) 外國列傳取一時代之關係較巨者以概其餘

四 志表所以備檢查而分量極繁重不易採錄本書只採漢書藝文志隋書經

籍志二篇

五 二十四史現行各本字大者價極昂字小者又易傷日本書用四號字排印  
可省閱者目力

六 附錄二十四史總目及二十四史四庫提要兩種一以備緝簡一以明源流  
且可引起學者研究全史之興味

七 本書之稿先後易定三十餘回每易一回多得同志之斟酌指導最後得此  
視初定之稿什易三四矣但恐去取不當之處仍多深盼 大雅匡正

二十四史輯要目錄

卷之一 五帝

五帝本紀 史記

卷之二 夏

夏本紀 史記

卷之三 殷

殷本紀 史記

卷之四 周

周本紀 史記

卷之五 周

吳太伯世家 史記

齊太公世家 史記

魯周公世家 史記

衛康叔世家 史記

宋微子世家 史記

卷之六 周

晉世家史記

楚世家史記

卷之七

周

越王勾踐世家史記

鄭世家史記

趙世家史記

魏世家史記

韓世家史記

田敬仲完世家史記

卷之八

周

孔子世家史記

卷之九

周

伯夷列傳史記

老莊申韓列傳史記

商君列傳史記

蘇秦列傳史記

孟子荀卿列傳史記

卷之十

周

刺客列傳史記

游俠列傳史記附

貨殖列傳史記附

卷之十一

秦

秦本紀史記

卷之十二 秦

秦始皇本紀 史記  
李斯列傳 史記

卷之十三 秦漢之際

陳涉世家 史記  
項羽本紀 史記

卷之十四 漢

高祖本紀 史記  
呂后本紀 史記  
孝文本紀 史記  
孝景本紀 史記

卷之十五 漢

武帝紀 漢書  
宣帝紀 漢書  
哀帝紀 漢書  
平帝紀 漢書

卷之十六 漢

蕭相國世家 史記  
留侯世家 史記

卷之十七 漢

淮陰侯列傳 史記  
南越尉佗列傳 史記  
李廣蘇建傳 漢書

衛青霍去病傳 漢書  
張騫李廣利傳 漢書  
霍光金日磾傳 漢書



卷之十八 漢

西域傳 漢書  
平準書 史記附  
藝文志 漢書附

卷之十九 新

王莽傳 漢書

卷之二十 後漢

光武帝紀 後漢書  
獻帝紀 後漢書

卷之二十一 後漢

班超傳 後漢書  
董卓傳 後漢書  
袁紹傳 後漢書

卷之二十二 後漢

黨錮列傳 後漢書  
宦者列傳 後漢書

卷之二十三 後漢

西域傳 後漢書

卷之二十四 三國 魏

武帝三國志 文帝三國志 齊王 高貴鄉公 陳留王三國志

卷之二十五 二國 魏

鄧艾 鍾會三國志

卷之二十六 二國 蜀

先主三國志 後主三國志

卷之二十七 三國 蜀

諸葛亮三國志 關羽 張飛三國志 蔣琬 費禕 姜維三國志

卷之二十八 三國 吳

孫堅 孫策三國志 孫權三國志 孫亮 孫休 孫皓三國志

卷之二十九 三國 吳

周瑜三國志 陸遜三國志

卷之三十 晉

宣帝晉書 安帝 恭帝晉書

卷之三十一 晉

陸機 晉書

祖逖 晉書

謝尚 謝安 晉書

劉元海 晉書

苻堅

王猛 晉書

卷之三十二 南北朝 宋

武帝 南史

順帝 南史

檀道濟 宋書

卷之三十三 南北朝 南齊

高帝 南史

和帝 南史

褚淵 南齊書

卷之三十四 南北朝 梁

武帝 南史

敬帝 南史

昭明太子統 梁書

沈約 梁書

卷之三十五 南北朝 陳

武帝 南史

後主 南史

杜僧明 陳書

卷之三十六 南北朝 魏

道武帝 北史

孝文帝 北史

靜帝 北史

衛操 魏書

卷之三十七

南北朝 北齊

神武帝 北史

後主 幼主 北齊書

尉景 北齊書

卷之三十八

南北朝 周

孝閔帝 周書

靜帝 周書

賀拔勝 周書

蘇綽 周書

卷之三十九

南北朝 隋

文帝 北史

煬帝 北史

恭帝 北史

韓擒 隋書

宇文化及 隋書

經籍志 隋書附

卷之四十

唐

高祖 新唐書

太宗 新唐書

卷之四十一

唐

則天皇后 舊唐書

武宗 新唐書

昭宗

哀帝 新唐書

卷之四十二

唐

李密 新唐書

魏徵 新唐書

李光弼 新唐書

郭子儀 新唐書

楊國忠 新唐書

田承嗣 新唐書

李林甫 新唐書

安祿山 新唐書

卷之四十三 唐

回紇 舊唐書

吐蕃 新唐書

南蠻 西南蠻 舊唐書

西戎 舊唐書

東夷 舊唐書

卷之四十四 五代 梁

太祖 末帝 新五代史

葛從周 舊五代史

王彥章 舊五代史

卷之四十五 五代 唐

莊宗 新五代史

愍帝 廢帝 新五代史

李嗣昭 舊五代史

卷之四十六 五代 晉

高祖 新五代史

出帝 新五代史

桑維翰 舊五代史

卷之四十七 五代 漢

高祖 隱帝 新五代史

劉審交 舊五代史

卷之四十八 五代 周

太祖新五代史

世宗

恭帝新五代史

高行周舊五代史

馮道新五代史

卷之四十九

五代

吳越世家新五代史

卷之五十

宋

太祖宋史

孝宗宋史

瀛國公二王附

宋史

卷之五十一

宋

王安石宋史

司馬光宋史

蘇軾宋史

李綱宋史

岳飛宋史

朱熹宋史

文天祥宋史

陳東宋史

秦檜宋史

卷之五十二

遼

太祖遼史

天祚帝遼史

耶律曷魯遼史

韓延徽遼史

耶律休哥遼史

卷之五十三

金

太祖金史

哀宗金史

幹魯金史

宗翰金史

宗弼金史

卷之五十四

元

太祖元史

卷之五十五

元

帖木兒不花元史

拜住元史

脫脫元史

耶律楚材元史

卷之五十六

元

工藝元史

卷之五十七

元

安南元史

緬占城

暹

瓜哇元史

卷之五十八

明

太祖明史

孝宗明史

莊烈帝明史

卷之五十九

明

魯王檀明史

唐王桎明史

潞王翊鏐明史

福王常洵明史

桂王常瀛明史

卷之六十 明

郭子興 韓林兒明史

陳友諒 張士誠 方國珍 明玉珍明史

擴廓帖木兒明史

卷之六十一 明

方孝孺明史 于謙明史 王守仁明史 戚繼光明史

張居正明史 顧憲成明史 徐光啟明史

卷之六十二 明

袁崇煥 毛文龍明史 史可法明史 鄭和明史

卷之六十三 明

李自成 張獻忠明史

卷之六十四 明

占城 寶童龍 眞臘 暹羅 瓜哇 閩婆 蘇吉丹 日羅夏治 三佛齊 淳泥



滿刺加 蘇門答刺 須文達那 蘇祿 西洋瑣里 瑣里 覽邦 淡巴

百花 彭亨 那孤兒 黎伐 南渤利 阿魯 柔佛 丁機宜 巴刺

西 佛郎機 和蘭 古里 柯枝 小葛蘭 大葛蘭 錫蘭山 榜葛刺

沼納樸兒 祖法兒 木骨都東 不刺哇 竹步 阿丹 刺撒麻林 忽

魯謨斯 溜山 比刺 孫刺 南巫里 加異勒 甘巴里 急蘭丹 沙里

灣泥 底里 千里達 失刺比 古里班卒 刺泥

夏刺比 窟察泥 奇刺泥 捨拉齊

彭加那 八可意 烏沙刺 踢 坎巴 阿哇 打回 白葛達 黑葛達 拂菻 意大里亞 明史

### 附錄

#### 二十四史總目

#### 二十四史四庫提要

# 二十四史輯要

## 卷之一 五帝

### 五帝本紀 史記

黃帝者少典之子姓公孫名曰軒轅生而神靈弱而能言幼而徇齊長而敦敏成而聰明軒轅之時神農氏世衰諸侯相侵伐暴虐百姓而神農氏弗能征於是軒轅乃習用干戈呂征不享諸侯咸來賓從而蚩尤最爲暴莫能伐炎帝欲侵陵諸侯諸侯咸歸軒轅軒轅乃脩德振兵治五氣藝五種撫萬民度四方教熊羆貔貅獬廌以與炎帝戰於阪泉之野三戰然後得其志蚩尤作亂不用帝命於是黃帝乃徵師諸侯與蚩尤戰於涿鹿之野遂禽殺蚩尤而諸侯咸尊軒轅爲天子代神農氏是爲黃帝天下有不順者黃帝從而征之平者去之披山通道未嘗寧居東至于海登丸山及岱宗西至于空桐登雞頭南至于江登熊湘北逐葷粥合符釜山而邑于涿鹿之阿遷徙往來無常處以師兵爲營衛官名皆以雲命爲雲師置左右大監監于萬國萬國和而鬼神山川封禪與爲多焉獲寶鼎迎日推策舉風后力牧常先大鴻以治民

順天地之紀幽明之占死生之說存亡之難時播百穀草木淳化鳥獸蟲蛾旁羅日月星辰水波士石金玉勞勤心力耳目節用水火材物有土德之瑞故號黃帝黃帝二十五子其得姓者十四人黃帝居軒轅之丘而娶於西陵之女是爲嫫祖嫫祖爲黃帝正妃生二子其後皆有天下其一曰玄囂是爲青陽青陽降居江水其二曰昌意降居若水昌意娶蜀山氏女曰昌僕生高陽高陽有聖德焉黃帝崩葬橋山其孫昌意之子高陽立是爲帝顓頊也

帝顓頊高陽者黃帝之孫而昌意之子也靜淵以有謀疏通而知事養材以任地載時以象天依鬼神以制義治氣以教化絜誠以祭祀北至于幽陵南至于交阯西至于流沙東至于蟠木動靜之物大小之神日月所照莫不砥屬帝顓頊生子曰窮蟬顓頊崩而玄囂之孫高辛立是爲帝嚳

帝嚳高辛者黃帝之曾孫也高辛父曰蟠極蟠極父曰玄囂玄囂父曰黃帝自玄囂與蟠極皆不得在位至高辛卽帝位高辛於顓頊爲族子高辛生而神靈自言其名普施利物不於其身聰以知遠明以察微順天之義知民之急仁而威惠而信脩身

而天下服取地之財而節用之撫教萬民而利誨之歷日月而迎送之明鬼神而敬事之其色郁郁其德嶷嶷其動也時其服也土帝嚳漑執中而徧天下日月所照風雨所至莫不從服帝嚳娶陳鋒氏女生放勛娶妣訾氏女生摯帝嚳崩而摯代立帝摯立不善崩而弟放勛立是爲帝堯

帝堯者放勛其仁如天其知如神就之如日望之如雲富而不驕貴而不舒黃收純衣彤車乘白馬能明馴德以親九族九族既睦便章百姓百姓昭明合和萬國乃命羲和敬順昊天數法日月星辰敬授民時分命羲仲居郁夷曰暘谷敬道日出便程東作日中星鳥以殷中春其民析鳥獸字微申命羲叔居南交便程南譌敬致日永星火以正中夏其民因鳥獸希革申命和仲居西土曰昧谷敬道日入便程西成夜中星虛以正中秋其民夷易鳥獸毛毳申命和叔居北方曰幽都便在伏物日短星昴以正中冬其民燠鳥獸氄毛歲三百六十六日以閏月正四時信飭百官衆功皆興堯曰誰可順此事放齊曰嗣子丹朱開明堯曰吁頑凶不用堯又曰誰可者謹兜曰共工旁聚布功可用堯曰共工善言其用僻似恭漫天不可堯又曰嗟四嶽湯湯

洪水滔天浩浩懷山襄陵下民其憂有能使治者皆曰鯀可堯曰鯀負命毀族不可  
嶽曰異哉試不可用而已堯於是聽嶽用鯀九載功用不成堯曰嗟四嶽朕在位七  
十載汝能庸命踐朕位嶽應曰鄙德忝帝位堯曰悉舉貴戚及疏遠隱匿者衆皆言  
於堯曰有矜在民間曰虞舜堯曰然朕聞之其何如嶽曰盲者子父頑母嚚弟傲能  
和以孝烝烝治不至姦堯曰吾其試哉於是堯妻之二女觀其德於二女舜飭下二  
女於媯汭如婦禮堯善之乃使舜慎和五典五典能從乃徧入百官百官時序賓於  
四門四門穆穆諸侯遠方賓客皆敬堯使舜入山林川澤暴風雷雨舜行不迷堯以  
爲聖召舜曰女謀事至而言可績三年矣女登帝位舜讓於德不憚正月上日舜受  
終於文祖文祖者堯大祖也於是帝堯老命舜攝行天子之政以觀天命舜乃在璿  
璣玉衡以齊七政遂類於上帝禋於六宗望於山川辯於羣神輯五瑞擇吉月日見  
四嶽諸牧班瑞歲二月東巡狩至於岱宗柴望秩於山川遂見東方君長合時月正  
日同律度量衡脩五禮五玉三帛二生一死爲摯如五器卒乃復五月南巡狩八月  
西巡狩十一月北巡狩皆如初歸至於祖禰廟用特牛禮五歲一巡狩羣后四朝徧

告以言明試以功車服以庸肇十有二州決川象以典刑流宥五刑鞭作官刑扑作  
教刑金作贖刑眚裁過赦怙終賊刑欽哉欽哉惟刑之靜哉謹兜進言共工堯曰不  
可而試之工師共工果淫辟四嶽舉鯀治鴻水堯以爲不可嶽疆請試之試之而無  
功故百姓不便三苗在江淮荊州數爲亂於是舜歸而言於帝請流共工於幽陵以  
變北狄放驩兜於崇山以變南蠻遷三苗於三危以變西戎殛鯀於羽山以變東夷  
四臯而天下咸服堯立七十年得舜二十年而老令舜攝行天子之政薦之於天堯  
辟位凡二十八年而崩百姓悲哀如喪父母三年四方莫舉樂以思堯堯知子丹朱  
之不肖不足授天下於是乃權授舜授舜則天下得其利而丹朱病授丹朱則天下  
病而丹朱得其利堯曰終不以天下之病而利一人而卒授舜以天下堯崩三年之  
喪畢舜讓辟丹朱於南河之南諸侯朝覲者不之丹朱而之舜獄訟者不之丹朱而  
之舜謳歌者不謳歌丹朱而謳歌舜舜曰天也夫而後之中國踐天子位焉是爲帝  
舜虞舜者名曰重華重華父曰瞽叟瞽叟父曰橋牛橋牛父曰句望句望父曰敬康  
敬康父曰窮蟬窮蟬父曰帝顓頊顓頊父曰昌意以至舜七世矣自從窮蟬以至帝

舜皆微爲庶人舜父瞽叟盲而舜母死瞽叟更娶妻而生象象傲瞽叟愛後妻子常欲殺舜舜避逃及有小過則受罪順事父及後母與弟日以篤謹匪有懈舜冀州之人也舜耕歷山漁雷澤陶河濱作什器於壽丘就時於負夏舜父瞽叟頑母嚚弟象傲皆欲殺舜舜順適不失子道兄弟孝慈欲殺不可得卽求常在側舜年二十以孝聞三十而帝堯問可用者四嶽咸薦虞舜曰可於是堯乃以二女妻舜以觀其內使九男與處以觀其外舜居媯汭內行彌謹堯二女不敢以貴驕事舜親戚甚有婦道堯九男皆益篤舜耕歷山歷山之人皆讓畔漁雷澤雷澤上人皆讓居陶河濱河濱器皆不苦窳一年而所居成聚二年成邑三年成都堯乃賜舜絺衣與琴爲築倉廩予牛羊瞽叟尙復欲殺之使舜上塗廩瞽叟從下縱火焚廩舜乃以兩笠自扞而下去得不死後瞽叟又使舜穿井舜穿井爲匿空旁出舜旣入深瞽叟與象共下土實井舜從匿空出去瞽叟象喜以舜爲已死象曰本謀者象象與其父母分於是曰舜妻堯二女與琴象取之牛羊倉廩予父母象乃止舜宮居鼓其琴舜往見之象愕不懌曰我思舜正鬱陶舜曰然爾其庶矣舜復事瞽叟愛弟彌謹於是堯乃試舜五典

百官皆治昔高陽氏有才子八人世得其利謂之八愷高辛氏有才子八人世謂之八元此十六族者世濟其美不隕其名至於堯堯未能舉舜舉八愷使主后土以揆百事莫不時序舉八元使布五教於四方父義母慈兄友弟恭子孝內平外成昔帝鴻氏有不才子掩義隱賊好行凶慝天下謂之渾沌少皞氏有不才子毀信惡忠崇飾惡言天下謂之窮奇顓頊氏有不才子不可教訓不知話言天下謂之檮杌此三族世憂之至于堯堯未能去縉雲氏有不才子貪於飲食冒於貨賄天下謂之饕餮天下惡之比之三凶舜賓於四門乃流四凶族遷於四裔以御螭魅於是四門辟言毋凶人也舜入於大麓烈風雷雨不迷堯乃知舜之足授天下堯老使舜攝行天子政巡狩舜得舉用事二十年而堯使攝政攝政八年而堯崩三年喪畢讓丹朱天下歸舜而禹皋陶契后稷伯夷夔龍垂益彭祖自堯時而皆舉用未有分職於是舜乃至於文祖謀於四嶽辟四門明通四方耳目命十二牧論帝德行厚德遠佞人則蠻夷率服舜謂四嶽曰有能奮庸美堯之事者使居官相事皆曰伯禹爲司空可美帝功舜曰嗟然禹汝平水土維是勉哉禹拜稽首讓於稷契與皋陶舜曰然往矣舜曰



棄黎民始饑汝后稷播時百穀舜曰契百姓不親五品不馴汝爲司徒而敬敷五教  
在寬舜曰皋陶蠻夷猾夏寇賊姦軌汝作士五刑有服五服三就五流有度五度三  
居維明能信舜曰誰能馴予工皆曰垂可於是以垂爲共工舜曰誰能馴予上下草  
木鳥獸皆曰益可於是以益爲朕虞益拜稽首讓於諸臣朱虎熊羆舜曰往矣汝諧  
遂以朱虎熊羆爲佐舜曰嗟四嶽有能典朕三禮皆曰伯夷可舜曰嗟伯夷以汝爲  
秩宗夙夜維敬直哉維靜潔伯夷讓夔龍舜曰然以夔爲典樂教禘子直而溫寬而  
栗剛而無虐簡而無傲詩言意歌長言聲依永律和聲八音能諧毋相奪倫神人以  
和夔曰於予擊石拊石百獸率舞舜曰龍朕畏忌讒說殄僞振驚朕衆命汝爲納言  
夙夜出入朕命惟信舜曰嗟女二十有二人敬哉惟時相天事三歲一考功三考絀  
陟遠近衆功咸興分北三苗此二十二人咸成厥功皋陶爲大理平民各伏得其實  
伯夷主禮上下咸讓垂主工師百工致功益主虞山澤辟棄主稷百穀時茂契主司  
徒百姓親和龍主賓客遠人至十二牧行而九州莫敢辟違唯禹之功爲大披九山  
通九澤決九河定九州各以其職來貢不失厥宜方五千里至於荒服南撫交阯北

發西戎析枝渠廋氏羌北山戎發息慎東長鳥夷四海之內咸戴帝舜之功於是禹  
乃興九招之樂致異物鳳皇來翔天下明德皆自虞帝始舜年二十以孝聞年三十  
堯舉之年五十攝行天子事年五十八堯崩年六十一代堯踐帝位踐帝位三十九  
年南巡狩崩於蒼梧之野葬於江南九疑是爲零陵舜之踐帝位載天子旗往朝父  
瞽叟夔夔唯謹如子道封弟象爲諸侯舜子商均亦不肖舜乃豫薦禹於天十七年  
而崩三年喪畢禹亦乃讓舜子如舜讓堯子諸侯歸之然後禹踐天子位堯子丹朱  
舜子商均皆有疆土以奉先祀服其服禮樂如之以客見天子天子弗臣示不敢專  
也自黃帝至舜禹皆同姓而異其國號以章明德故黃帝爲有熊帝顓頊爲高陽帝  
嚳爲高辛帝堯爲陶唐帝舜爲有虞帝禹爲夏后而別氏姓妣氏契爲商姓子氏棄  
爲周姓姬氏

Blank page with vertical lines and a faint watermark.

# 二十四史輯要

## 卷之二 夏

夏本紀

史記

夏禹名曰文命禹之父曰鯀鯀之父曰帝顓頊顓頊之父曰昌意昌意之父曰黃帝禹者黃帝之玄孫而帝顓頊之孫也禹之曾大父昌意及父鯀皆不得在帝位爲人臣當帝堯之時鴻水滔天浩浩懷山襄陵下民其憂堯求能治水者羣臣四嶽皆曰鯀可堯曰鯀爲人負命毀族不可四嶽曰等之未有賢於鯀者願帝試之於是堯聽四嶽用鯀治水九年而水不息功用不成於是帝堯乃求人更得舜舜登用攝行天子之政巡狩行視鯀之治水無狀乃殛鯀於羽山以死天下皆以舜之誅爲是於是舜舉鯀子禹而使續鯀之業堯崩帝舜問四嶽曰有能成美堯之事者使居官皆曰伯禹爲司空可成美堯之功舜曰嗟然命禹女平水土維是勉之禹拜稽首讓於契后稷皋陶舜曰女其往視爾事矣禹爲人敏給克勤其德不違其仁可親其言可信聲爲律身爲度稱以出匱匱穆穆爲綱爲紀禹乃遂與益后稷奉帝命命諸侯百姓

興人徒以傅土行山表木定高山大川禹傷先人父鯀功之不成受誅乃勞身焦思  
居外十三年過家門不敢入薄衣食致孝於鬼神卑宮室致費於溝減陸行乘車水  
行乘船泥行乘橈山行乘攢左準繩右規矩載四時以開九州通九道陂九澤度九  
山令益予衆庶稻可種卑濕命后稷予衆庶難得之食食少調有餘相給以均諸侯  
禹乃行相地宜所有以貢及山川之便利禹行自冀州始冀州既載壺口治梁及岐  
既脩太原至於嶽陽覃懷致功至於衡漳其土白壤賦上上錯田中中常衛既從大  
陸既爲鳥夷皮服夾右碣石入於海濟河維沅州九河既道雷夏既澤雍沮會同桑  
土既蠶於是民得下丘居土其土黑墳草繇木條田中下賦貞作十有三年乃同其  
貢漆絲其筐織文浮於濟潔通於河海岱維青州嵎夷既略濰淄既道其土白墳海  
濱廣鴻厥田斥鹵田上下賦中上厥貢鹽絺海物維錯岱畎絲枲鉛松怪石萊夷爲  
牧其筐倉絲浮於汶通於濟海岱及淮惟徐州淮沂其治蒙羽其藪大野既都東原  
底平其土赤埴墳草木漸包其田上中賦中中貢維土五色羽畎夏翟嶧陽孤桐泗  
濱浮磬淮夷蠙珠泉魚其筐玄纁縞浮于淮泗通于河淮海維揚州彭蠡既都陽鳥

所居三江既入震澤致定竹箭旣布其草惟夭其木惟喬其土塗泥田下下賦下上  
上雜貢金三品瑤琨竹箭齒革羽毛鳥夷卉服其篚織貝其包橘柚錫貢均江海通  
淮泗荆及衡陽維荊州江漢朝宗於海九江甚中沱涔已道雲夢土爲治其土塗泥  
田下中賦上下貢羽旄齒革金三品棟榦栝栢礪砥磬丹維箛箛楛三國致貢其名  
包匭菁茅其篚玄纁璣組九江入賜大龜浮於江沱涔於漢踰于雒至於南河荆河  
惟豫州伊雒漣澗旣入於河榮播旣都道荷澤被明都其土壤下土墳墟田中上賦  
雜上中貢漆絲絺紵其篚織絮錫貢磬錯浮於雒達於河華陽黑水惟梁州汶嶧旣  
蓺沱涔旣道蔡蒙旅平和夷底績其土青驪田下上賦下中三錯貢璆鐵銀鏤磬磬  
熊羆狐狸織皮西傾因桓是來浮於潛踰於沔入於渭亂於河黑水西河惟雍州弱  
水旣西涇屬渭汭漆沮旣從灃水所同荆岐已旅終南敦物至於鳥鼠原隰底績至  
於都野三危旣度三苗大序其土黃壤田上上賦中下貢璆琳琅玕浮於積石至於  
龍門西河會於渭汭織皮昆侖析支渠搜西戎卽序道九山沂及岐至於荆山踰於  
河壺口雷首至於太嶽砥柱析城至於王屋太行常山至於碣石入於海西傾朱圉

鳥鼠至於太華熊耳外方桐栢至於負尾道蟠冢至於荆山內方至於大別汝山之陽至於衡山過九江至於敷淺原道九川弱水至於合黎餘波入於流沙道黑水至於三危入於南海道河積石至於龍門南至華陰東至砥柱又東至於盟津東過雒汭至於大邳北過降水至於大陸北播爲九河同爲逆河入於海蟠冢道瀆東流爲漢又東爲蒼浪之水過三澨入於大別南入於江東匯澤爲彭蠡東爲北江入於海汝山道江東別爲沱又東至于醴過九江至於東陵東迤北會于匯東爲中江入於海道沅水東爲濟入於河洑爲滎東出陶丘北又東至於荷又東北會於汝又北東入於海道淮自桐栢東會於泗沂東入於海道渭自鳥鼠同穴東會於灃又東北至於涇東過漆沮入於河道雒自熊耳東北會於澗瀍又東會於伊東北入於河於是九州攸同四奧旣居九山棨旅九川滌原九澤旣陂四海會同六府甚脩衆土交正致慎財賦咸則三壤成賦中國賜土姓祇台德先不距朕行令天子之國以外五百里甸服百里賦納總二百里納銍三百里納秸服四百里粟五百里米甸服外五百里侯服百里采二百里任國三百里諸侯服外五百里綏服三百里揆文教二百里

里奮武衛綏服外五百里要服三百里夷二百里蔡要服外五百里荒服三百里蠻二百里流東漸於海西被於流沙朔南暨聲教訖于四海於是帝錫禹玄圭以告成功于天下天下於是太平治皋陶作士以理民帝舜朝禹伯夷皋陶相與語帝前皋陶述其謀曰信其道德謀明輔和禹曰然如何皋陶曰於慎其身脩思長敦序九族衆明高翼近可遠在已禹拜美言曰然皋陶曰於在知人在安民禹曰吁皆若是惟帝其難之知人則智能官人能安民則惠黎民懷之能知能惠何憂乎驩兜何遷乎有苗何畏乎巧言善色佞人皋陶曰然於亦行有九德亦言其有德乃言曰始事事寬而栗柔而立愿而共治而敬擾而毅直而溫簡而廉剛而實彊而義章其有常吉哉日宣三德蚤夜翊明有家日嚴振敬六德亮采有國翕受普施九德咸事俊乂在官百吏肅謹毋教邪淫奇謀非其人居其官是謂亂天事天討有辜五刑五用哉吾言底可行乎禹曰女言致可績行皋陶曰余未有知思贊道哉帝舜謂禹曰汝亦昌言禹拜曰於予何言予思日孳孳皋陶難禹曰何謂孳孳禹曰鴻水滔天浩浩懷山襄陵下民皆服於水予陸行乘車水行乘舟泥行乘橈山行乘攢行山棗木與益予



衆庶稻鮮食以決九川致四海浚賦澮致之川與稷予衆庶難得之食食少調有餘  
補不足徙居衆民乃定萬國爲治皋陶曰然此而美也禹曰於帝慎乃在位安爾止  
輔德天下大應清意以昭待上帝命天其重命用休帝曰吁臣哉臣哉臣作朕股肱  
耳目予欲左右有民女輔之余欲觀古人之象日月星辰作文繡服色女明之予欲  
聞六律五聲八音來始滑以出入五言女聽予卽辟女匡拂予女無面諛退而謗予  
敬四輔臣諸衆讒嬖臣君德誠施皆清矣禹曰然帝卽不時布同善惡則毋功帝曰  
毋若丹朱傲維慢游是好毋水行舟朋淫于家用絕其世予不能順是禹曰予辛壬  
娶塗山癸甲生啟予不子以故能成水土功輔成五服至於五千里州十二師外薄  
四海咸建五長各道有功苗頑不卽功帝其念哉帝曰道吾德乃女功序之也皋陶  
於是敬禹之德令民皆則禹不如言刑從之舜德大明於是夔行樂祖考至羣后相  
讓鳥獸翔舞簫韶九成鳳皇來儀百獸率舞百官信諧帝用此作歌曰陟天之命維  
時維幾乃歌曰股肱喜哉元首起哉百工熙哉皋陶拜手稽首揚言曰念哉率爲興  
事慎乃憲敬哉乃更爲歌曰元首明哉股肱良哉庶事康哉又歌曰元首叢脞哉股

肱情哉萬事墮哉帝拜曰然往欽哉於是天下皆宗禹之明度數聲樂爲山川神主  
帝舜薦禹於天爲嗣十七年而帝舜崩三年喪畢禹辭避舜之子商均於陽城天下  
諸侯皆去商均而朝禹禹於是遂卽天子位南面朝天下國號曰夏后姓姒氏帝禹  
立而舉皋陶薦之且授政焉而皋陶卒封皋陶之後於英六或在許而后舉益任之  
政十年帝禹東巡狩至於會稽而崩以天下授益三年之喪畢益讓帝禹之子啟而  
辟居箕山之陽禹子啟賢天下屬意焉及禹崩雖授益益之佐禹日淺天下未洽故  
諸侯皆去益而朝啟曰吾君帝禹之子也於是啟遂卽天子之位是爲夏后帝啟夏  
后帝啟禹之子其母塗山氏之女也有扈氏不服啟伐之大戰於甘將戰作甘誓乃  
召六卿申之啟曰嗟六事之人予誓告女有扈氏威侮五行怠棄三正天用勦絕其  
命今予維共行天之罰左不攻于左右不攻于右女不共命御非其馬之政女不共  
命用命賞于祖不用命僇于社予則帑僇汝遂滅有扈氏天下咸朝夏后帝啟崩子  
帝太康立帝太康失國昆弟五人須于洛汭作五子之歌太康崩弟中康立是爲帝  
中康帝中康時羲和涵淫廢時亂日脣往征之作脣征中康崩子帝相立帝相崩子

帝少康立帝少康崩子帝予立帝予崩子帝槐立帝槐崩子帝芒立帝芒崩子帝泄立帝泄崩子帝不降立帝不降崩弟帝扃立帝扃崩子帝廛立帝廛崩立帝不降之子孔甲是爲帝孔甲帝孔甲立好方鬼神事淫亂夏后氏德衰諸侯畔之天降龍二有雌雄孔甲不能食未得豢龍氏陶唐既衰其後有劉累學擾龍於豢龍氏以事孔甲孔甲賜之姓曰御龍氏受豕韋之後龍一雌死以食夏后夏后使求懼而遷去孔甲崩子帝皋立帝皋崩子帝發立帝發崩子帝履癸立是爲桀帝桀之時自孔甲以來而諸侯多畔夏桀不務德而武傷百姓百姓弗堪迺召湯而囚之夏臺已而釋之湯脩德諸侯皆歸湯湯遂率兵以伐夏桀桀走鳴條遂放而死桀謂人曰吾悔不遂殺湯於夏臺使至此湯乃踐天子位代夏朝天下湯封夏之後至周封於杞也

# 二十四史輯要

## 卷之三 殷

### 殷本紀 史記

殷契母曰簡狄有娥氏之女爲帝嚳次妃三人行浴見玄鳥墮其卵簡狄取吞之因孕生契契長而佐禹治水有功帝舜乃命契曰百姓不親五品不訓汝爲司徒而敬敷五教五教在寬封於商賜姓子氏契興於唐虞大禹之際功業著於百姓百姓以平契卒子昭明立昭明卒子相土立相土卒子昌若立昌若卒子曹圉立曹圉卒子冥立冥卒子振立振卒子微立微卒子報丁立報丁卒子報乙立報乙卒子報丙立報丙卒子主壬立主壬卒子主癸立主癸卒子天乙立是爲成湯成湯自契至湯八遷湯始居亳從先王居作帝誥湯征諸侯葛伯不祀湯始伐之湯曰予有言人視水見形視民知治不伊尹曰明哉言能聽道乃進君國子民爲善者皆在王官勉哉勉哉湯曰汝不能敬命予大罰殛之無有攸赦作湯征伊尹名阿衡阿衡欲干湯而無由乃爲有莘氏媵臣負鼎俎以滋味說湯致於王道或曰伊尹處士湯使人聘迎之

五反然後肯往從湯言素王及九主之事湯舉任以國政伊尹去湯適夏既醜有夏復歸於亳入自北門遇女鳩女房作女鳩女房湯出見野張網四面祝曰自天下四方皆入吾網湯曰嘻盡之矣乃去其三面祝曰欲左左欲右右不用命乃入吾網諸侯聞之曰湯德至矣及禽獸當是時夏桀爲虐政淫荒而諸侯昆吾氏爲亂湯乃興師率諸侯伊尹從湯湯自把鉞以伐昆吾遂伐桀湯曰格汝衆庶來女悉聽朕言匪台小子敢行舉亂有夏多罪予維聞女衆言夏氏有罪予畏上帝不敢不正今夏多罪天命殛之今女有衆女曰我君不恤我衆舍我嗇事而割政女其曰有罪其奈何夏王率止衆力率奪夏國有衆率怠不和曰是日何時喪予與女皆亡夏德若茲今朕必往爾尙及予一人致天之罰予其大理女女毋不信朕不食言女不從誓言予則帑僂女無有攸赦以告令師作湯誓於是湯曰吾甚武號曰武王桀敗於有娥之墟桀轟於鳴條夏師敗績湯遂伐三豎俘厥寶玉義伯仲伯作典寶湯既勝夏欲遷其社不可作夏社伊尹報於是諸侯服湯乃踐天子位平定海內湯歸至於泰卷陶中鬻作誥既緝夏命還亳作湯誥維三月王自至於東郊告諸侯羣后毋不有功於

民勤力迺事予乃大罰殛女毋予怨曰古禹皋陶久勞於外其有功乎民民乃有安東爲江北爲濟西爲河南爲淮四瀆已脩萬民乃有居后稷降播農殖百穀三公咸有功於民故后有立昔蚩尤與其大夫作亂百姓帝乃弗予有狀先王言不可不勉曰不道毋之在國女毋我怨以令諸侯伊尹作咸有一德咎單作明居湯乃改正朔易服色上白朝會以晝湯崩太子太丁未立而卒於是迺立太丁之弟外丙是爲帝外丙卽位二年崩立外丙之弟中壬是爲帝中壬帝中壬卽位四年崩伊尹迺立太丁之子太甲太甲成湯適長孫也是爲帝太甲帝太甲元年伊尹作伊訓作肆命作徂后帝太甲既立三年不明暴虐不遵湯法亂德於是伊尹放之於桐宮三年伊尹攝行政當國以朝諸侯帝太甲居桐宮三年悔過自責反善於是伊尹迺迎帝太甲而授之政帝太甲脩德諸侯咸歸殷百姓以寧伊尹嘉之迺作太甲訓三篇褒帝太甲稱太宗太宗崩子沃丁立帝沃丁之時伊尹卒既葬伊尹於亳咎單遂訓伊尹事作沃丁沃丁崩弟太庚立是爲帝太庚帝太庚崩子帝小甲立帝小甲崩弟雍已立是爲帝雍已殷道衰諸侯或不至帝雍已崩弟太戊立是爲帝太戊帝太戊

立伊陟爲相亳有祥桑穀共生於朝一暮大拱帝太戊懼問伊陟伊陟曰臣聞妖不勝德帝之政其有闕與帝其修德太戊從之而祥桑枯死而去伊陟贊言于巫咸巫咸治王家有成作咸艾作太戊帝太戊贊伊陟于廟言弗臣伊陟讓作原命殷復興諸侯歸之故稱中宗中宗崩子帝仲丁立帝仲丁遷于隰河亶甲居相祖乙遷于邢帝仲丁崩弟外壬立是爲帝外壬仲丁書闕不具帝外壬崩弟河亶甲立是爲帝河亶甲河亶甲時殷復衰河亶甲崩子帝祖乙立帝祖乙立殷復興巫賢任職祖乙崩子帝祖辛立帝祖辛崩弟沃甲立是爲帝沃甲帝沃甲崩立沃甲兄祖辛之子祖丁是爲帝祖丁帝祖丁崩立弟沃甲之子南庚是爲帝南庚帝南庚崩立帝祖丁之子陽甲是爲帝陽甲帝陽甲之時殷衰自中丁以來廢適而更立諸弟子弟子或爭相代立比九世亂於是諸侯莫朝帝陽甲崩弟盤庚立是爲帝盤庚帝盤庚之時殷已都河北盤庚渡河南復居成湯之故居迺五遷無定處殷民咨胥皆怨不欲徙盤庚乃告諭諸侯大臣曰昔高后成湯與爾之先祖俱定天下法則可修舍而弗勉何以成德乃遂涉河南治亳行湯之政然後百姓由寧殷道復興諸侯來朝以其遵成湯

之德也帝盤庚崩弟小辛立是爲帝小辛帝小辛立殷復衰百姓思盤庚迺作盤庚三篇帝小辛崩弟小乙立是爲帝小乙帝小乙崩子帝武丁立帝武丁卽位思復興殷而未得其佐三年不言政事決定於冢宰以觀國風武丁夜夢得聖人名曰說以夢所見視羣臣百吏皆非也於是迺使百工營求之野得說於傅險中是時說爲胥靡築於傅險見於武丁武丁曰是也得而與之語果聖人舉以爲相殷國大治故遂以傅險姓之號曰傅說帝武丁祭成湯明日有飛雉登鼎耳而响武丁懼祖己曰王勿憂先修政事祖己乃訓王曰唯天監下典厥義降年有永有不永非天天民中絕其命民有不若德不聽罪天旣附命正厥德乃曰其奈何嗚呼王嗣敬民罔非天繼常祀毋豐於棄道武丁修政行德天下咸驩殷道復興帝武丁崩子帝祖庚立祖己嘉武丁之以祥雉爲德立其廟爲高宗遂作高宗彤日及訓帝祖庚崩弟祖甲立是爲帝甲帝甲淫亂殷復衰帝甲崩子帝廩辛立帝廩辛崩弟庚丁立是爲帝庚丁帝庚丁崩子帝武乙立殷復去亳徙河北帝武乙無道爲偶人謂之天神與之博令人爲行天神不勝乃僂辱之爲革囊盛血仰而射之命曰射天武乙獵於河渭之間暴



雷武乙震死子帝太丁立帝太丁崩子帝乙立帝乙立殷益衰帝乙長子曰微子啟  
啟母賤不得嗣少子辛辛母正后辛爲嗣帝乙崩子辛立是爲帝辛天下謂之紂帝  
紂資辨捷疾聞見甚敏材力過人手格猛獸知足以距諫言足以飾非矜人臣以能  
高天下以聲以爲皆出己之下好酒淫樂嬖於婦人愛妲己妲己之言是從於是使  
師涓作新淫聲北里之舞靡靡之樂厚賦稅以實鹿臺之錢而盈鉅橋之粟益收狗  
馬奇物充仞宮室益廣沙丘苑臺多取野獸蜚鳥置其中慢於鬼神大最樂戲於沙  
丘以酒爲池縣肉爲林使男女僕相逐其間爲長夜之飲百姓怨望而諸侯有畔者  
於是紂乃重刑辟有炮烙之法以西伯昌九侯鄂侯爲三公九侯有好女入之紂九  
侯女不憲淫紂怒殺之而醢九侯鄂侯爭之彊辨之疾并脯鄂侯西伯昌聞之竊歎  
崇侯虎知之以告紂紂囚西伯羗里西伯之臣閔天之徒求美女奇物善馬以獻紂  
紂乃赦西伯西伯出而獻洛西之地以請除炮烙之刑紂乃許之賜弓矢斧鉞使得  
征伐爲西伯而用費中爲政費中善諛好利殷人弗親紂又用惡來惡來善毀讒諸  
侯以此益疏西伯歸乃陰修德行善諸侯多叛紂而往歸西伯西伯滋大紂由是稍

失權重王子比干諫弗聽商容賢者百姓愛之紂廢之及西伯伐飢國滅之紂之臣祖伊聞之而咎周恐奔告紂曰天既訖我殷命假人元龜無敢知吉非先王不相我後人維王淫虐用自絕故天棄我不有安食不虞知天性不迪率典今我民罔不欲喪曰天曷不降威大命胡不至今王其奈何紂曰我生不有命在天乎祖伊反曰紂不可諫矣西伯旣卒周武王之東伐至盟津諸侯叛殷會周者八百諸侯皆曰紂可伐矣武王曰爾未知天命乃復歸紂愈淫亂不止微子數諫不聽乃與太師少師謀遂去比干曰爲人臣者不得不以死爭迺強諫紂怒曰吾聞聖人心有七竅剖比干觀其心箕子懼乃詳狂爲奴紂又囚之殷之太師少師乃持其祭樂器奔周周武王於是遂率諸侯伐紂亦發兵距之牧野甲子日紂兵敗紂走入登鹿臺衣其寶玉衣赴火而死周武王遂斬紂頭縣之太白旗殺妲己釋箕子之囚封比干之墓表商容之闕封紂子武庚祿父以續殷祀令修行盤庚之政殷民大說於是周武王爲天子其後世貶帝號號爲王而封殷後爲諸侯屬周周武王崩武庚與管叔蔡叔作亂成王命周公誅之而立微子於宋以續殷後焉

天于其勞... 德安以... 德安以...

天于其勞... 德安以... 德安以...

天于其勞... 德安以... 德安以...

天于其勞... 德安以... 德安以...

天于其勞... 德安以... 德安以...

天于其勞... 德安以... 德安以...

天于其勞... 德安以... 德安以...

天于其勞... 德安以... 德安以...

天于其勞... 德安以... 德安以...

天于其勞... 德安以... 德安以...

天于其勞... 德安以... 德安以...

天于其勞... 德安以... 德安以...

天于其勞... 德安以... 德安以...

# 二十四史輯要

## 卷之四 周

### 周本紀 史記

周后稷名棄其母有邠氏女曰姜原姜原爲帝嚳元妃姜原出野見巨人跡心忻然說欲踐之踐之而身動如孕者居期而生子以爲不祥棄之隘巷馬牛過者皆辟不踐徙置之林中適會山林多人遷之而棄渠中冰上飛鳥以其翼覆薦之姜原以爲神遂收養長之初欲棄之因名曰棄棄爲兒時屹如巨人之志其遊戲好種樹麻菽麻菽美及爲成人遂好耕農相地之宜宜穀者稼穡焉民皆法則之帝堯聞之舉棄爲農師天下得其利有功帝舜曰棄黎民始飢爾后稷播時百穀封棄於邠號曰后稷別姓姬氏后稷之興在陶唐虞夏之際皆有令德后稷卒子不窋立不窋末年夏后氏政衰去稷不務不窋以失其官而犇戎狄之間不窋卒子鞠立鞠卒子公劉立公劉雖在戎狄之間復修后稷之業務耕種行地宜自漆沮渡渭取材用行者有資居者有畜積民賴其慶百姓懷之多徙而保歸焉周道之興自此始故詩人歌樂思

其德公劉卒子慶節立國於豳慶節卒子皇僕立皇僕卒子羌弗立羌弗卒子毀隃立毀隃卒子公非立公非卒子高圉立高圉卒子亞圉立亞圉卒子公叔祖類立公叔祖類卒子古公亶父立古公亶父復修后稷公劉之業積德行義國人皆戴之薰育戎狄攻之欲得財物予之已復攻欲得地與民民皆怒欲戰古公曰有民立君將以利之今戎狄所爲攻戰以吾地與民民之在我與其在彼何異民欲以我故戰殺人父子而君之予不忍爲乃與私屬遂去豳渡漆沮踰梁山止於岐下豳人舉國扶老攜弱盡復歸古公於岐下及他旁國聞古公仁亦多歸之於是古公乃貶戎狄之俗而營築城郭室屋而邑別居之作五官有司民皆歌樂之頌其德古公有長子曰太伯次曰虞仲太姜生少子季歷季歷娶太任皆賢婦人生昌有聖瑞古公曰我世當有興者其在昌乎長子太伯虞仲知古公欲立季歷以傳昌乃二人亡如荊蠻文身斷髮以讓季歷古公卒季歷立是爲公季公季修古公遺道篤於行義諸侯順之公季卒子昌立是爲西伯西伯曰文王遵后稷公劉之業則古公公季之法篤仁敬老慈少禮下賢者日中不暇食以待士士以此多歸之伯夷叔齊在孤竹聞西伯善

養老盍往歸之太顛闕天散宜生鬻子辛甲大夫之徒皆往歸之崇侯虎譖西伯於殷紂曰西伯積善累德諸侯皆嚮之將不利於帝帝紂乃囚西伯於羑里闕天之徒患之乃求有莘氏美女驪戎之文馬有熊九駟他奇怪物因殷嬖臣費仲而獻之紂紂大悅曰此一物足以釋西伯況其多乎乃赦西伯賜之弓矢斧鉞使西伯得征伐曰譖西伯者崇侯虎也西伯乃獻洛西之地以請紂去炮烙之刑紂許之西伯陰行善諸侯皆來決平於是虞芮之人有獄不能決乃如周入界耕者皆讓畔民俗皆讓長虞芮之人未見西伯皆慙相謂曰吾所爭周人所恥何往爲祇取辱耳遂還俱讓而去諸侯聞之曰西伯蓋受命之君明年伐犬戎明年伐密須明年敗耆國殷之祖伊聞之懼以告帝紂紂曰不有天命乎是何能爲明年伐邶明年伐崇侯虎而作豐邑自岐下而徙都豐明年西伯崩太子發立是爲武王西伯蓋卽位五十年其囚羑里蓋益易之八卦爲六十四卦詩人道西伯蓋受命之年稱王而斷虞芮之訟後七

年而崩諡爲文王改法度制正朔矣追尊古公爲太王公季爲王季蓋王瑞自太王興武王卽位太公望爲師周公旦爲輔召公畢公之徒左右王師修文王緒業九年

武王上祭于畢東觀兵至于盟津爲文王木主載以車中軍武王自稱太子發言奉文王以伐不敢自專乃告司馬司徒司空諸節齊栗信哉予無知以先祖有德臣小子受先功畢力賞罰以定其功遂興師師尙父號曰總爾衆庶與爾舟楫後至者斬武王渡河中流白魚躍入王舟中武王俯取以祭既渡有火自上復于下至於王屋流爲烏其色赤其聲魄云是時諸侯不期而會盟津者八百諸侯諸侯皆曰紂可伐矣武王曰女未知天命未可也乃還師歸居二年聞紂昏亂暴虐滋甚殺王子比干囚箕子太師疵少師彊抱其樂器而犇周於是武王徧告諸侯曰殷有重罪不可以不畢伐乃遵文王遂率戎車三百乘虎賁三千人甲士四萬五千人以東伐紂十一年十二月戊午師畢渡盟津諸侯咸會曰孳孳無怠武王乃作太誓告于衆庶今殷王紂乃用其婦人之言自絕于天毀壞其三正離遏其王父母弟乃斷棄其先祖之樂乃爲淫聲用變亂正聲怡說婦人故今予發維共行天罰勉哉夫子不可再不可三二月甲子昧爽武王朝至於商郊牧野乃誓武王左杖黃鉞右秉白旄以麾曰遠矣西土之人武王曰嗟我有國家君司徒司馬司空亞旅師氏千夫長百夫長及庸

蜀羌髡微纒彭濮人稱爾戈比爾干立爾矛予其誓王曰古人有言牝雞無晨牝雞之晨惟家之索今殷王紂維婦人言是用自棄其先祖肆祀不答昏棄其家國遺其王父母弟不用乃維四方之多罪逋逃是崇是長是信是使俾暴虐于百姓以姦軌于商國今予發維共行天之罰今日之事不過六步七步乃止齊焉夫子勉哉不過於四伐五伐六伐七伐乃止齊焉勉哉夫子尙桓桓如虎如羆如豺如離于商郊不禦克犇以役西土勉哉夫子爾所不勉其于爾身有戮誓已諸侯兵會者車四千乘陳師牧野帝紂聞武王來亦發兵七十萬人距武王武王使師尙父與百夫致師以大卒馳帝紂師紂雖衆皆無戰之心心欲武王亟入紂師皆倒兵以戰以開武王武王馳之紂兵皆崩畔紂紂走反入登于鹿臺之上蒙衣其珠玉自燔于火而死武王持大白旗以麾諸侯諸侯畢拜武王武王乃揖諸侯諸侯畢從武王至商國商國百姓咸待於郊於是武王使羣臣告語商百姓曰上天降休商人皆再拜稽首武王亦答拜遂入至紂死所武王自射之三發而後下車以輕劔擊之以黃鉞斬紂頭縣大白之旗已而至紂之嬖妾二女二女皆經自殺武王又射三發擊以劔斬以玄鉞



縣其頭小白之旗武王已乃出復軍其明日除道修社及商紂宮及期百夫荷罕旗以先驅武王弟叔振鐸奉陳常車周公旦把大鉞畢公把小鉞以夾武王散宜生太顛閎夭皆執劔以衛武王既入立于社南大卒之左右畢從毛叔鄭奉明水衛康叔封布茲召公奭贊采師尙父牽牲尹佚筮祝曰殷之末孫季紂殄廢先王明德侮蔑神祇不祀昏暴商邑百姓其章顯聞于天上帝於是武王再拜稽首曰膺更大命革殷受天明命武王又再拜稽首乃出封商紂子祿父殷之餘民武王爲殷初定未集乃使其弟管叔鮮蔡叔度相祿父治殷已而命召公釋箕子之囚命畢公釋百姓之囚表商容之閭命南宮括散鹿臺之財發鉅橋之粟以振貧弱萌隸命南宮括史佚展九鼎保玉命閎夭封比干之墓命宗祝享祠于軍乃罷兵西歸行狩記政事作武成封諸侯班賜宗彝作分殷之器物武王追思先聖王乃褒封神農之後於焦黃帝之後於祝帝堯之後於薊帝舜之後於陳大禹之後於杞於是封功臣謀士而師尙父爲首封封尙父於營丘曰齊封弟周公旦於曲阜曰魯封召公奭於燕封弟叔鮮於管弟叔度於蔡餘各以次受封武王徵九牧之君登幽之阜以望商邑武王至

于周自夜不寐周公旦卽王所曰曷爲不寐王曰告女維天不饗殷自發未生於今六十年麋鹿在牧蜚鴻滿野天不享殷今乃有成維天建殷其登名民三百六十夫不顯亦不賓滅以至今我未定天保何暇寐王曰定天保依天室悉求夫惡貶從殷王受日夜勞來定我西土我維顯服及德方明自洛汭延于伊汭居易毋固其有夏之居我南望三塗北望嶽鄙顧瞻有河粵詹維伊毋遠天室營周居于雒邑而後去縱馬於華山之陽牧牛於桃林之虛偃干戈振兵釋旅示天下不復用也武王已克殷後二年問箕子殷所以亡箕子不忍言殷惡以存亡國宜告武王亦醜故問以天道武王病天下未集羣公懼穆卜周公乃祓齋自爲質欲代武王武王有瘳後而崩太子誦代立是爲成王成王少周初定天下周公恐諸侯畔周公乃攝行政當國管叔蔡叔羣弟疑周公與武庚作亂畔周周公奉成王命伐誅武庚管叔放蔡叔以微子開代殷後國於宋頗收殷餘民以封武王少弟封爲衛康叔晉唐叔得嘉穀獻之成王成王以歸周公于兵所周公受禾東土魯天子之命初管蔡畔周周公討之三年而畢定故初作大誥次作微子之命次歸禾次嘉禾次康誥酒誥梓材其事在周

公之篇周公行政七年成王長周公反政成王北面就羣臣之位成王在豐使召公復營洛邑如武王之意周公復卜申視卒營築居九鼎焉曰此天下之中四方入貢道里均作召誥洛誥成王既遷殷遺民周公以王命告作多士無佚召公爲保周公爲師東伐淮夷殘奄遷其君薄姑成王自奄歸在宗周作多方既紂殷命襲淮夷歸在豐作周官興正禮樂度制於是改而民和睦頌聲興成王既伐東夷息慎來賀王賜榮伯作賄息慎之命成王將崩懼太子釗之不任乃命召公畢公率諸侯以相太子而立之成王既崩二公率諸侯以太子釗見於先王廟申告以文王武王之所以爲王業之不易務在節儉毋多欲以篤信臨之作顧命太子釗遂立是爲康王康王卽位徧告諸侯宣告以文武之業以申之作康誥故成康之際天下安寧刑錯四十餘年不用康王命作策畢公分居里成周郊作畢命康王卒子昭王瑕立昭王之時王道微缺昭王南巡狩不返卒於江上其卒不赴告諱之也立昭王子滿是爲穆王穆王卽位春秋已五十矣王道衰微穆王閱文武之道缺乃命伯冏申誡太僕國之政作冏命復寧穆王將征犬戎祭公謀父諫曰不可先王耀德不觀兵夫兵戢而時

動動則威觀則玩玩則無震是故周文公之頌曰載戢干戈載櫜弓矢我求懿德肆于時夏允王保之先王之於民也茂正其德而厚其性阜其財求而利其器用明利害之鄉以文修之使之務利而辟害懷德而畏威故能保世以滋大昔我先王世后稷以服事虞夏及夏之衰也棄稷不務我先王不窋用失其官而自竄於戎狄之間不敢怠業時序其德遵修其緒修其訓典朝夕恪勤守以敦篤奉以忠信奕世載德不忝前人至于文王武王昭前之光明而加之以慈和事神保民無不欣喜商王帝辛大惡于民庶民不忍訢載武王以致戎于商牧是故先王非務武也勤恤民隱而除其害也夫先王之制邦內甸服邦外侯服侯衛賓服夷蠻要服戎翟荒服甸服者祭侯服者祀賓服者享要服者貢荒服者王日祭月祀時享歲貢終王先王之順祀也有不祭則修意有不祀則修言有不享則修文有不貢則修名有不王則修德序成而有不至則修刑於是有刑不祭伐不祀征不享讓不貢告不王於是有刑罰之辟有攻伐之兵有征討之備有威讓之命有文告之辭布令陳辭而有不至則增修於德無勤民於遠是以近無不聽遠無不服今自大畢伯士之終也犬戎氏以其職

來王天子曰予必以不享征之且觀之兵無乃廢先王之訓而王幾頓乎吾聞犬戎樹敦率舊德而守終純固其有以禦我矣王遂征之得四白狼四白鹿以歸自是荒服者不至諸侯有不睦者甫侯言於王作修刑辟王曰吁來有國有土告汝祥刑在今爾安百姓何擇非其人何敬非其刑何居非其宜與兩造具備師聽五辭五辭簡信正於五刑五刑不簡正於五罰五罰不服正於五過五過之疵官獄內獄閱實其罪惟鈞其過五刑之疑有赦五罰之疑有赦其審克之簡信有衆惟訊有稽無簡不疑共嚴天威黥辟疑赦其罰百率閱實其罪劓辟疑赦其罰倍灑閱實其罪臙辟疑赦其罰倍差閱實其罪宮辟疑赦其罰五百率閱實其罪大辟疑赦其罰千率閱實其罪墨罰之屬千劓罰之屬千臙罰之屬五百宮罰之屬三百大辟之罰其屬二百五刑之屬三千命曰甫刑穆王立五十五年崩子共王繫扈立共王游於涇上密康公從有三女犇之其母曰必致之王夫獸三爲羣人三爲衆女三爲粲王田不取羣公行不下衆王御不參一族夫粲美之物也衆以美物歸女而何德以堪之王猶不堪況爾之小醜乎小醜備物終必亡康公不獻一年共王滅密共王崩子懿王難立

懿王之時王室遂衰詩人作刺懿王崩共王弟辟方立是爲孝王孝王崩諸侯復立懿王太子燮是爲夷王夷王崩子厲王胡立厲王卽位三十年好利近榮夷公大夫芮良夫諫厲王曰王室其將卑乎夫榮公好專利而不知大難夫利百物之所生也天地之所載也而有專之其害多矣天地百物皆將取焉何可專也所怒甚多而不備大難以是教王王其能久乎夫王人者將導利而布之上下者也使神人百物無不得極猶日怵惕懼怨之來也故頌曰思文后稷克配彼天立我烝民莫匪爾極大雅曰陳錫載周是不布利而懼難乎故能載周以至於今今王學專利其可乎匹夫專利猶謂之盜王而行之其歸鮮矣榮公若用周必敗也厲王不聽卒以榮公爲卿士用事王行暴虐侈傲國人謗王召公諫曰民不堪命矣王怒得衛巫使監謗者以告則殺之其謗鮮矣諸侯不朝三十四年王益嚴國人莫敢言道路以目厲王喜告召公曰吾能弭謗矣乃不敢言召公曰是鄭之也防民之口甚於防水水壅而潰傷人必多民亦如之是故爲水者決之使導爲民者宣之使言故天子聽政使公卿至於列士獻詩瞽獻典史獻書師箴瞽賦矇誦百工諫庶人傳語近臣盡規親戚補察

瞽史教誨者艾修之而後王斟酌焉是以事行而不悖民之有口也猶土之有山川也財用於是乎出猶其有原隰衍沃也衣食於是乎生口之宣言也善敗於是乎興行善而備敗所以產財用衣食者也夫民慮之於心而宣之於口成而行之若壅其口其與能幾何王不聽於是國莫敢出言三年乃相與畔襲厲王厲王出奔於彘厲王太子靜匿召公之家國人聞之乃圍之召公曰昔吾驟諫王王不從以及此難也今殺王太子王其以我爲讎而懟怒乎夫事君者險而不讎懟怒而不怒況事王乎乃以其子代王太子太子竟得脫召公周公二相行政號曰共和共和十四年厲王死于彘太子靜長於召公家二相乃共立之爲王是爲宣王宣王卽位二相輔之修政法文武成康之遺風諸侯復宗周十二年魯武公來朝宣王不修籍於千畝虢文公諫曰不可王弗聽三十九年戰于千畝王師敗績于姜氏之戎宣王旣亡南國之師乃料民於太原仲山甫諫曰民不可料也宣王不聽卒料民四十六年宣王崩子幽王宮涅立幽王二年西周三川皆震伯陽甫曰周將亡矣夫天地之氣不失其序若過其序民亂之也陽伏而不能出陰迫而不能蒸於是有地震今三川實震是陽

失其所而填陰也陽失而在陰原必塞原塞國必亡夫水土演而民用也土無所演民乏財用不亡何待昔伊洛竭而夏亡河竭而商亡今周德若二代之季矣其川原又塞塞必竭夫國必依山川山崩川竭亡國之徵也川竭必山崩若國亡不過十年數之紀也天之所棄不過其紀是歲也三川竭岐山崩三年幽王嬖愛褒姒褒姒生子伯服幽王欲廢太子太子母申侯女而爲后後幽王得褒姒愛之欲廢申后并去太子宜臼以褒姒爲后以伯服爲太子周太史伯陽讀史記曰周亡矣昔自夏后氏之衰也有二神龍止於夏帝庭而言曰余褒之二君夏帝卜殺之與去之與止之莫吉卜請其禱而藏之乃吉於是布幣而策告之龍亡而禱在櫝而去之夏亡傳此器殷殷亡又傳此器周比三代莫敢發之至厲王之末發而觀之禱流于庭不可除厲王使婦人裸而禱之禱化爲玄黿以入王後宮後宮之童妾旣齷而遭之旣笄而孕無夫而生子懼而棄之宣王之時童女謠曰檠弧箕服實亡周國於是宣王聞之有夫婦賣是器者宣王使執而戮之逃於道而見鄉者後宮童妾所棄妖子出於路者聞其夜啼哀而收之夫婦遂亡犇於褒褒人有罪請入童妾所棄女子者於王以贖



罪棄女子出於褻是爲褻妣當幽王三年王之後宮見而愛之生子伯服竟廢申后及太子以褻妣爲后伯服爲太子太史伯陽曰禍成矣無可奈何褻妣不好笑幽王欲其笑萬方故不笑幽王爲燧燧大鼓有寇至則舉燧火諸侯悉至至而無寇褻妣乃大笑幽王說之爲數舉燧火其後不信諸侯益亦不至幽王以虢石父爲卿用事國人皆怨石父爲人佞巧善諛好利王用之又廢申后去太子也申侯怒與緡西夷犬戎攻幽王幽王舉燧火徵兵兵莫至遂殺幽王驪山下虜褻妣盡取周賂而去於是諸侯乃卽申侯而共立故幽王太子宜臼是爲平王以奉周祀平王立東遷于維邑辟戎寇平王之時周室衰微諸侯彊并弱齊楚秦晉始大政由方伯四十九年魯隱公卽位五十一年平王崩太子洩父蚤死立其子林是爲桓王桓王平王孫也桓王三年鄭莊公朝桓王不禮五年鄭宛與魯易許田許田天子之用事太山田也八年魯殺隱公立桓公十三年伐鄭鄭射傷桓王桓王去歸二十三年桓王崩子莊王佗立莊王四年周公黑肩欲殺莊王而立王子克辛伯告王王殺周公王子克犇燕十五年莊王崩子釐王胡齊立釐王三年齊桓公始霸五年釐王崩子惠王闔立惠

王二年初莊王嬖姬姚生子頽頽有寵及惠王卽位奪其大臣園以爲囿故大夫邊伯等五人作亂謀召燕衛師伐惠王惠王犇温已居鄭之櫟立釐王弟頽爲王樂及徧舞鄭虢君怒四年鄭與虢君伐殺王頽復入惠王惠王十年賜齊桓公爲伯二十五年惠王崩子襄王鄭立襄王母早死後母曰惠后惠后生叔帶有寵於惠王襄王畏之三年叔帶與戎翟謀伐襄王襄王欲誅叔帶叔帶犇齊齊桓公使管仲平戎于周使隰朋平戎于晉王以上卿禮管仲管仲辭曰臣賤有司也有天子之二守國高在若節春秋來承王命何以禮焉陪臣敢辭王曰舅氏余嘉乃勳毋逆朕命管仲卒受下卿之禮而還九年齊桓公卒十二年叔帶復歸於周十三年鄭伐滑王使游孫伯服請滑鄭人囚之鄭文公怨惠王之入不與厲公爵又怨襄王之與衛滑故囚伯服王怒將以翟伐鄭富辰諫曰凡我周之東徙晉鄭焉依子頽之亂又鄭之由定今以小怨棄之王不聽十五年王降翟師以伐鄭王德翟人將以其女爲后富辰諫曰平桓莊惠皆受鄭勞王棄親親翟不可從王不聽十六年王絀翟后翟人來誅殺譚伯富辰曰吾數諫不從如是不出王以我爲懟乎乃以其屬死之初惠后欲立王子

帶故以黨開翟人翟人遂入周襄王出犇鄭鄭居王於汜子帶立爲王取襄王所紉翟后與居温十七年襄王告急于晉晉文公納王而誅叔帶襄王乃賜晉文公珪鬯弓矢爲伯以河內地與晉二十年晉文公召襄王襄王會之河陽踐土諸侯畢朝書諱曰天王狩于河陽二十四年晉文公卒三十一年秦穆公卒三十二年襄王崩子頃王壬臣立頃王六年崩子匡王班立匡王六年崩弟瑜立是爲定王定王元年楚莊王伐陸渾之戎次洛使人問九鼎王使王孫滿應設以辭楚兵乃去十年楚莊王圍鄭鄭伯降已而復之十六年楚莊王卒二十一年定王崩子簡王夷立簡王十三年晉殺其君厲公迎子周於周立爲悼公十四年簡王崩子靈王泄心立靈王二十四年齊崔杼弑其君莊公二十七年靈王崩子景王貴立景王十八年后太子聖而早卒二十年景王愛子朝欲立之會崩子丐之黨與爭立國人立長子猛爲王子朝攻殺猛猛爲悼王晉人攻子朝而立丐是爲敬王敬王元年晉人入敬王子朝自立敬王不得入居澤四年晉率諸侯入敬王于周子朝爲臣諸侯城周十六年子朝之徒復作亂敬王犇于晉十七年晉定公遂入敬王于周三十九年齊田常殺其君簡

公四十一年楚滅陳孔子卒四十二年敬王崩子元王仁立元王八年崩子定王介  
立定王十六年三晉滅智伯分有其地二十八年定王崩長子去疾立是爲哀王哀  
王立三月弟叔襲殺哀王而自立是爲思王思王立五月少弟嵬攻殺思王而自立  
是爲考王此三王皆定王之子考王十五年崩子威烈王午立考王封其弟于河南  
是爲桓公以續周公之官職桓公卒子威公代立威公卒子惠公代立乃封其少子  
於鞏以奉王號東周惠公威烈王二十三年九鼎震命韓魏趙爲諸侯二十四年崩  
子安王驕立是歲盜殺楚聲王安王立二十六年崩子烈王喜立烈王二年周太史  
儋見秦獻公曰始周與秦國合而別別五百載復合合十七歲而霸王者出焉十年  
烈王崩弟扁立是爲顯王顯王五年賀秦獻公獻公稱伯九年致文武胙於秦孝公  
二十五年秦會諸侯於周二十六年周致伯於秦孝公三十三年賀秦惠王三十五  
年致文武胙於秦惠王四十四年秦惠王稱王其後諸侯皆爲王四十八年顯王崩  
子慎靚王定立慎靚王立六年崩子赧王延立王赧時東西周分治王赧徙都西周  
西周武公之共太子死有五庶子毋適立司馬翦謂楚王曰不如以地資公子咎爲


請太子左成曰不可周不聽是公之知困而交疏於周也不如請周君孰欲立以微告翦翦請令楚賀之以地果立公子咎爲太子八年秦攻宜陽楚救之而楚以周爲秦故將伐之蘇代爲周說楚王曰何以周爲秦之禍也言周之爲秦甚於楚者欲令周入秦也故謂周秦也周知其不可解必入於秦此爲秦取周之精者也爲王計者周於秦因善之不於秦亦言善之以疏之於秦周絕於秦必入於郢矣秦借道兩周之間將以伐韓周恐借之畏於韓不借畏於秦史厭謂周君曰何不令人謂韓公叔曰秦之敢絕周而伐韓者信東周也公何不與周地發質使之楚秦必疑楚不信周是韓不伐也又謂秦曰韓彊與周地將以疑周於秦也周不敢不受秦必無辭而令周不受是受地於韓而聽於秦秦召西周君西周君惡往故令人謂韓王曰秦召西周君將以使攻王之南陽也王何不出兵於南陽周君將以爲辭於秦周君不入秦秦必不敢踰河而攻南陽矣東周與西周戰韓救西周或爲東周說韓王曰西周故天子之國多名器重寶王案兵毋出可以德東周而西周之寶必可以盡矣王赧謂成君楚圍雍氏韓徵甲與粟於東周東周君恐召蘇代而告之代曰君何患於是臣

能使韓毋徵甲與粟 周又能爲君得高都周君曰子苟能請以國聽子代見韓相  
國曰楚圍雍氏期三月也今五月不能拔是楚病也今相國乃徵甲與粟於周是告  
楚病也韓相國曰善使者已行矣代曰何不與周高都韓相國大怒曰吾毋徵甲與  
粟於周亦已多矣何故與周高都也代曰與周高都是周折而入於韓也秦聞之必  
大怒忿周卽不通周使是以弊高都得完周也曷爲不與相國曰善果與周高都三  
十四年蘇厲謂周君曰秦破韓魏扑師武北取趙蘭離石者皆白起也是善用兵又  
有天命今又將兵出塞攻梁梁破則周危矣君何不令人說白起乎曰楚有養由基  
者善射者也去柳葉百步而射之百發而百中之左右觀者數千人皆曰善射有一  
夫立其旁曰善可教射矣養由基怒釋弓搯劍曰客安能教我射乎客曰非吾能教  
子支左誦右也夫去柳葉百步而射之百發而百中之不以善息少焉氣衰力倦弓  
撥矢鉤一發不中者百發盡息今破韓魏扑師武北取趙蘭離石者公之功多矣今  
又將兵出塞過兩周倍韓攻梁一舉不得前功盡棄公不如稱病而無出四十二年  
秦破華陽約馬犯謂周君曰請令梁城周乃謂梁王曰周王病若死則犯必死矣犯

請以九鼎自入於王王受九鼎而圖犯梁王曰善遂與之卒言戍周因謂秦王曰梁非戍周也將伐周也王試出兵境以觀之秦果出兵又謂梁王曰周王病甚矣犯請後可而復之今王使卒之周諸侯皆生心後舉事且不信不若令卒爲周城以匿事端梁王曰善遂使城周四十五年周君之秦客謂周最曰公不若譽秦王之孝因以應爲太后養地秦王必喜是公有秦交交善周君必以爲公功交惡勸周君入秦者必有罪矣秦攻周而周最謂秦王曰爲王計者不攻周攻周實不足以利聲畏天下天下以聲畏秦必東合於齊兵弊於周合天下於齊則秦不王矣天下欲弊秦勸王攻周秦與天下弊則令不行矣五十八年三晉距秦周令其相國之秦以秦之輕也還其行客謂相國曰秦之輕重未可知也秦欲知三國之情公不如急見秦王曰請爲王聽東方之變秦王必重公重公是秦重周周以取秦也齊重則固有周聚以收齊是周常不失重國之交也秦信周發兵攻三晉五十九年秦取韓陽城負黍西周恐倍秦與諸侯約從將天下銳師出伊闕攻秦令秦無得通陽城秦昭王怒使將軍摎攻西周西周君犇秦頓首受罪盡獻其邑三十六口三萬秦受其獻歸其君於周

周君王赧卒周民遂東亡秦取九鼎寶器而遷西周公於憇狐後七歲秦莊襄王滅  
東西周東西周皆入于秦周既不祀





# 二十四史輯要

## 卷之五 周

### 吳太伯世家 史記

吳太伯太伯弟仲雍皆周太王之子而王季歷之兄也季歷賢而有聖子昌太王欲立季歷以及昌於是太伯仲雍二人乃犇荆蠻文身斷髮示不可用以避季歷季歷果立是爲王季而昌爲文王太伯之犇荆蠻自號句吳荆蠻義之從而歸之千餘家立爲吳太伯太伯卒無子弟仲雍立是爲吳仲雍仲雍卒子季簡立季簡卒子叔達立叔達卒子周章立是時周武王克殷求太伯仲雍之後得周章周章已君吳因而封之乃封周章弟虞仲於周之北故夏虛是爲虞仲列爲諸侯周章卒子熊遂立熊遂卒子柯相立柯相卒子彊鳩夷立彊鳩夷卒子餘橋疑吾立餘橋疑吾卒子柯盧立柯盧卒子周繇立周繇卒子屈羽立屈羽卒子夷吾立夷吾卒子禽處立禽處卒子轉立轉卒子頗高立頗高卒子句卑立是時晉獻公滅周北虞公以開晉伐虢也句卑卒子去齊立去齊卒子壽夢立壽夢立而吳始益大稱王自太伯作吳五世而

武王克殷封其後爲二其一虞在中國其一吳在夷蠻十二世而晉滅中國之虞中國之虞滅二世而夷蠻之吳興大凡從太伯至壽夢十九世王壽夢二年楚之亡大夫申公巫臣怨楚將子反而犇晉自晉使吳敎吳用兵乘車令其子爲吳行人吳於是始通於中國吳伐楚十六年楚共王伐吳至衡山二十五年王壽夢卒壽夢有子四人長曰諸樊次曰餘祭次曰餘昧次曰季札季札賢而壽夢欲立之季札讓不可於是乃立長子諸樊攝行事當國王諸樊元年諸樊已除喪讓位季札季札謝曰曹宣公之卒也諸侯與曹人不義曹君將立子臧子臧去之以成曹君君子曰能守節矣君義嗣誰敢干君有國非吾節也札雖不材願附於子臧之義吳人固立季札季札棄其室而耕乃舍之秋吳伐楚楚敗我師四年晉平公初立十三年王諸樊卒有命授弟餘祭欲傳以次必致國於季札而止以稱先王壽夢之意且嘉季札之義兄弟皆欲致國令以漸至焉季札封於延陵故號曰延陵季子王餘祭三年齊相慶封有罪自齊來犇吳吳予慶封朱方之縣以爲奉邑以女妻之富於在齊四年吳使季札聘於魯請觀周樂爲歌周南召南曰美哉始基之矣猶未也然勤而不怨歌邶鄘

衛曰美哉淵乎憂而不困者也吾聞衛康叔武公之德如是是其衛風乎歌王曰美哉思而不懼其周之東乎歌鄭曰其細已甚民不堪也是其先亡乎歌齊曰美哉泱泱乎大風也哉表東海者其太公乎國未可量也歌豳曰美哉蕩蕩乎樂而不淫其周公之東乎歌秦曰此之謂夏聲夫能夏則大大之至也其周之舊乎歌魏曰美哉風颯乎大而婉儉而易行以德輔此則盟主也歌唐曰思深哉其有陶唐氏之遺風乎不然何憂之遠也非令德之後誰能若是歌陳曰國無主其能久乎自鄩以下無譏焉歌小雅曰美哉思而不貳怨而不言其周德之衰乎猶有先王之遺民也歌大雅曰廣哉熙熙乎曲而有直體其文王之德乎歌頌曰至矣哉直而不倨曲而不詘近而不偪遠而不攜遷而不淫復而不厭哀而不愁樂而不荒用而不匱廣而不宣施而不費取而不貪處而不底行而不流五聲和八風平節有度守有序盛德之所同也見舞象箛南籥者曰美哉猶有憾見舞大武曰美哉周之盛也其若此乎見舞韶護者曰聖人之弘也猶有慙德聖人之難也見舞大夏曰美哉勤而不德非禹其誰能及之見舞招箛曰德至矣哉大矣如天之無不燾也如地之無不載也雖甚盛

德無以加矣觀止矣若有他樂吾不敢觀去魯遂使齊說晏平仲曰子速納邑與政無邑無政乃免於難齊國之政將有所歸未得所歸難未息也故晏子因陳桓子以納政與邑是以免於欒高之難去齊使於鄭見子產如舊交謂子產曰鄭之執政侈難將至矣政必及子子爲政慎以禮不然鄭國將敗去鄭適衛說蘧瑗史狗史鱸公子荆公叔發公子朝曰衛多君子未有患也自衛如晉將舍於宿聞鐘聲曰異哉吾聞之辯而不德必加於戮夫子獲罪於君以在此懼猶不足而又可以畔乎夫子之在此猶燕之巢于幕也君在殯而可以樂乎遂去之文子聞之終身不聽琴瑟適晉說趙文子韓宣子魏獻子曰晉國其萃於三家乎將去謂叔向曰吾子勉之君侈而多良大夫皆富政將在三家吾子直必思自免於難季札之初使北過徐君徐君好季札劔口弗敢言季札心知之爲使上國未獻還至徐徐君已死於是乃解其寶劔繫之徐君冢樹而去從者曰徐君已死尙誰予乎季子曰不然始吾心已許之豈以死倍吾心哉七年楚公子圍弑其王夾敖而代立是爲靈王十年楚靈王會諸侯而以伐吳之朱方以誅齊慶封吳亦攻楚取三邑而去十一年楚伐吳至雩婁十二年

楚復來伐次於乾谿楚師敗走十七年王餘昧卒弟餘昧立王餘昧二年楚公子棄疾弑其君靈王代立焉四年王餘昧卒欲授弟季札季札讓逃去於是吳人曰先王有命兄卒弟代立必致季子季子今逃位則王餘昧後立今卒其子當代乃立王餘昧之子僚爲王王僚二年公子光伐楚敗而亡王舟光懼襲楚復得王舟而還五年楚之亡臣伍子胥來奔公子光客之公子光者王諸樊之子也常以爲吾父兄弟四人當傳至季子季子卽不受國光父先立卽不傳季子光當立陰納賢士欲以襲王僚八年吳使公子光伐楚敗楚師迎楚故太子建母於居巢以歸因北伐敗陳蔡之師九年公子光伐楚拔居巢鍾離初楚邊邑卑梁氏之處女與吳邊邑之女爭桑二女家怒相滅兩國邊邑長聞之怒而相攻滅吳之邊邑吳王怒故遂伐楚取兩都而去伍子胥之初犇吳說吳王僚以伐楚之利公子光曰胥之父兄爲僂於楚欲自報其仇耳未見其利於是伍員知光有他志乃求勇士專諸見之光光喜乃客伍子胥子胥退而耕於野以待專諸之事十二年冬楚平王卒十三年春吳欲因楚喪而伐之使公子蓋餘燭庸以兵圍楚之六灣使季札於晉以觀諸侯之變楚發兵絕吳兵

後吳兵不得還於是吳公子光曰此時不可失也告專諸曰不索何獲我真王嗣當立吾欲求之季子雖至不吾廢也專諸曰王僚可殺也母老子弱而兩公子將兵攻楚楚絕其路方今吳外困於楚而內空無骨鯁之臣是無奈我何光曰我身子之身也四月丙子光伏甲士於窟室而謁王僚飲王僚使兵陳於道自王宮至光之家門階戶席皆王僚之親也人夾持鉞公子光詳爲足疾入于窟室使專諸置匕首於炙魚之中以進食手匕首刺王僚鉞交於匈遂弑王僚公子光竟代立爲王是爲吳王闔廬闔廬乃以專諸子爲卿季子至曰苟先君無廢祀民人無廢主社稷有奉乃吾君也吾敢誰怨乎哀死事生以待天命非我生亂立者從之先人之道也復命哭僚墓復位而待吳公子燭庸蓋餘二人將兵遇圍於楚者聞公子光弑王僚自立乃以其兵降楚楚封之於舒王闔廬元年舉伍子胥爲行人而與謀國事楚誅伯州犂其孫伯嚭亡奔吳吳以爲大夫三年吳王闔廬與子胥伯嚭將兵伐楚拔舒殺吳亡將二公子光謀欲入郢將軍孫武曰民勞未可待之四年伐楚取六與澆五年伐越敗之六年楚使子常囊瓦伐吳迎而擊之大敗楚軍於豫章取楚之居巢而還九年吳

王闔廬謂伍子胥孫武曰始子之言郢未可入今果如何二子對曰楚將子常貪而唐蔡皆怨之王必欲大伐必得唐蔡乃可闔廬從之悉興師與唐蔡西伐楚至於漢水楚亦發兵拒吳夾水陳吳王闔廬弟夫槩欲戰闔廬弗許夫槩曰王已屬臣兵兵以利爲上尙何待焉遂以其部五千人襲冒楚楚兵大敗走於是吳王遂縱兵追之比至郢五戰楚五敗楚昭王亡出郢奔鄖鄖公弟欲弑昭王昭王與鄖公犇隨而吳兵遂入鄖子胥伯詒鞭平王之尸以報父讎十年春越聞吳王之在郢國空乃伐吳吳使別兵擊越楚告急秦秦遣兵救楚擊吳吳師敗廬闔弟夫槩見秦越交敗吳吳王留楚不去夫槩亡歸吳而自立爲吳王闔廬聞之乃引兵歸攻夫槩夫槩敗奔楚楚昭王乃得以九月復入郢而封夫槩於堂谿爲堂谿氏十一年吳王使太子夫差伐楚取番楚恐而去郢徙都十五年孔子相魯十九年夏吳伐越越王句踐迎擊之槁李越使死士挑戰三行造吳師呼自剄吳師觀之越因伐吳敗之姑蘇傷吳王闔廬指軍卻七里吳王病傷而死闔廬使立太子夫差謂曰爾而忘句踐殺汝父乎對曰不敢三年乃報越王夫差元年以大夫伯詒爲太宰習戰射常以報越爲志二年



吳王悉精兵以伐越敗之夫椒報姑蘇也越王句踐乃以甲兵五千人棲於會稽使大夫種因吳太宰嚭而行成請委國爲臣妾吳王將許之伍子胥諫曰昔有過氏殺斟灌以伐斟尋滅夏后帝相帝相之妃后緡方娠逃於有仍而生少康少康爲有仍牧正有過又欲殺少康少康奔有虞有虞思夏德於是妻之以二女而邑之於綸有田一成有衆一旅後遂收夏衆撫其官職使人誘之遂滅有過氏復禹之績祀夏配天不失舊物今吳不如有過之彊而句踐大於少康今不因此而滅之又將寬之不亦難乎且句踐爲人能辛苦今不滅後必悔之吳王不聽聽太宰嚭卒許越平與盟而罷兵去七年吳王夫差聞齊景公死而大臣爭寵新君弱乃興師北伐齊子胥諫曰越王句踐食不重味衣不重采弔死問疾且欲有所用其衆此人不死必爲吳患今越在腹心疾而王不先而務齊不亦謬乎吳王不聽遂北伐齊敗齊師於艾陵至緡召魯哀公而徵百牢季康子使子貢以周禮說太宰嚭乃得止因留略地於齊魯之南九年爲騶伐魯至與魯盟乃去十年因伐齊而歸十一年復北伐齊越王句踐率其衆以朝吳厚獻遺之吳王喜唯子胥懼曰是棄吳也諫曰越在腹心今得志於

齊猶石田無所用且盤庚之誥有顛越勿遺商之以興吳王不聽使子胥於齊子胥屬其子於齊鮑氏還報吳王吳王聞之大怒賜子胥屬鏹之劍以死將死曰樹吾墓上以梓令可爲器抉吾眼置之吳東門以觀越之滅吳也齊鮑氏弑齊悼公吳王聞之哭於軍門外三日乃從海上攻齊齊人敗吳吳王乃引兵歸十三年吳召魯衛之君會於橐臯十四年春吳王北會諸侯於黃池欲霸中國以全周室六月戊子越王句踐伐吳乙酉越五千人與吳戰丙戌虜吳太子友丁亥入吳吳人告敗於王夫差夫差惡其聞也或泄其語吳王怒斬七人於幕下七月辛丑吳王與晉定公爭長吳王曰於周室我爲長晉定公曰於姬姓我爲伯趙鞅怒將伐吳乃長晉定公吳王已盟與晉別欲伐宋太宰嚭曰可勝而不能居也乃引兵歸國國亡太子內空王居外久士皆罷敝於是乃使厚幣以與越平十五年齊田常殺簡公十八年越益疆越王句踐率兵使伐敗吳師於笠澤楚滅陳二十年越王句踐復伐吳二十一年遂圍吳二十二年十一月丁卯越敗吳越王句踐欲遷吳王夫差於甬東予百家居之吳王曰孤老矣不能事君王也吾悔不用子胥之言自令陷此遂自剄死越王滅吳誅太

宰嚭以爲不忠而歸

齊太公世家

史記

太公望呂尙者東海上人其先祖嘗爲四嶽佐禹平水土甚有功虞夏之際封於呂或封於申姓姜氏夏商之時申呂或封枝庶子孫或爲庶人尙其後苗裔也本姓姜氏從其封姓故曰呂尙呂尙蓋嘗窮困年老矣以魚釣奸周西伯西伯將出獵卜之曰所獲非龍非虜非虎非羆所獲霸王之輔於是周西伯獵果遇太公於渭之陽與語大說曰自吾先君太公曰當有聖人適周周以興子真是邪吾太公望子久矣故號之曰太公望載與俱歸立爲師或曰太公博聞嘗事紂紂無道去之游說諸侯無所遇而卒西歸周西伯或曰呂尙處士隱海濱周西伯拘羑里散宜生閔夭素知而招呂尙呂尙亦曰吾聞西伯賢又善養老盍往焉三人者爲西伯求美女奇物獻之於紂以贖西伯西伯得以出反國言呂尙所以事周雖異然要之爲文武師周西伯昌之脫羑里歸與呂尙陰謀修德以傾商政其事多兵權與奇計故後世之言兵及周之陰權皆宗太公爲本謀周西伯政平及斷虞芮之訟而詩人稱西伯受命曰文

王伐崇密須犬夷大作豐邑天下三分其二歸周者太公之謀計居多文王崩武王卽位九年欲修文王業東伐以觀諸侯集否師行師尙父左杖黃鉞右把白旄以誓曰蒼兕蒼兕總爾衆庶與爾舟楫後至者斬遂至盟津諸侯不期而會者八百諸侯諸侯皆曰紂可伐也武王曰未可還師與太公作此太誓居二年紂殺王子比干囚箕子武王將伐紂卜龜兆不吉風雨暴至羣公盡懼唯太公彊之勸武王武王於是遂行十一年正月甲子誓於牧野伐商紂師敗績紂反走登鹿臺遂追斬紂明日武王立于社羣公奉明水衛康叔封布采席師尙父牽牲史佚策祝以告神討紂之罪散鹿臺之錢發鉅橋之粟以振貧民封比干墓釋箕子囚遷九鼎修周政與天下更始師尙父謀居多於是武王已平商而王天下封師尙父於齊營邱東就國道宿行遲逆旅之人曰吾聞時難得而易失客寢甚安殆非就國者也太公聞之夜衣而行黎明至國萊侯來伐與之爭營邱營邱邊萊萊人夷也會紂之亂而周初定未能集遠方是以與太公爭國太公至國修政因其俗簡其禮通商工之業便魚鹽之利而人民多歸齊齊爲大國及周成王少時管蔡作亂淮夷畔周乃使召康公命太公

曰東至海西至河南至穆陵北至無棣五侯九伯實得征之齊由此得征伐爲大國都營邱蓋太公之卒百有餘年子丁公呂伋立丁公卒子乙公得立乙公卒子癸公慈母立癸公卒子哀公不辰立哀公時紀侯譖之周周烹哀公而立其弟靜是爲胡公胡公徙都薄姑而當周夷王之時哀公之同母少弟山怨胡公乃與其黨率營邱人襲攻殺胡公而自立是爲獻公獻公元年盡逐胡公子因徙薄姑都治臨菑九年獻公卒子武公壽立武公九年周厲王出奔居彘十年王室亂大臣行政號曰共和二十四年周宣王初立二十六年武公卒子厲公無忌立厲公暴虐故胡公子復入齊齊人欲立之乃與攻殺厲公胡公子亦戰死齊人乃立厲公子赤爲君是爲文公而誅殺厲公者七十人文公十二年卒子成公脫立成公九年卒子莊公購立莊公二十四年犬戎殺幽王周東徙維秦始列爲諸侯五十六年晉弑其君昭侯六十四年莊公卒子釐公祿甫立釐公九年魯隱公初立十九年魯桓公弑其兄隱公而自立爲君二十五年北戎伐齊鄭使太子忽來救齊齊欲妻之忽曰鄭小齊大非我敵遂辭之三十二年釐公同母弟夷仲年死其子曰公孫無知釐公愛之令其秩服奉

養比太子三十三年釐公卒太子諸兒立是爲襄公襄公元年始爲太子時嘗與無  
知鬪及立紉無知秩服無知怨四年魯桓公與夫人如齊齊襄公故嘗私通魯夫人  
魯夫人者襄公女弟也自釐公時嫁爲魯桓公婦及桓公來而襄公復通焉魯桓公  
知之怒夫人夫人以告齊襄公齊襄公與魯君飲醉之使力士彭生抱上魯君車因  
拉殺魯桓公桓公下車則死矣魯人以爲讓而齊襄公殺彭生以謝魯八年伐紀紀  
遷去其邑十二年初襄公使連稱管至父戍葵邱瓜時而往及瓜而代往戍一歲卒  
瓜時而公弗爲發代或爲請代公弗許故此二人怒因公孫無知謀作亂連稱有從  
妹在公宮無寵使之間襄公曰事成以女爲無知夫人冬十二月襄公游姑棼遂獵  
沛邱見彘從者曰彭生公怒射之彘人立而啼公懼墜車傷足失屨反而鞭主屨者  
第三百第出宮而無知連稱管至父等聞公傷乃遂率其衆襲宮逢主屨第曰且  
無入驚宮驚宮未易入也無知弗信第示之創乃信之待宮外令第先入第先入卽  
匿襄公戶間良久無知等恐遂入宮第反與宮中及公之幸臣攻無知等不勝皆死  
無知入宮求公不得或見人足於戶間發視乃襄公遂弑之而無知自立爲齊君桓

公元年春齊君無知游於雍林雍林人嘗有怨無知及其往游雍林人襲殺無知告齊大夫曰無知弑襄公自立臣謹行誅唯大夫更立公子之當立者唯命是聽初襄公之醉殺魯桓公通其夫人殺誅數不當淫於婦人數欺大臣羣弟恐禍及故次弟糾奔魯其母魯女也管仲召忽傅之次弟小白奔莒鮑叔傅之小白母衛女也有寵於釐公小白自少好善大夫高傒及雍林人殺無知議立君高國先陰召小白於莒魯聞無知死亦發兵送公子糾而使管仲別將兵遮莒道射中小白帶鉤小白佯死管仲使人馳報魯魯送糾者行益遲六日至齊則小白已入高傒立之是爲桓公桓公之中鉤佯死以誤管仲已而載温車中馳行亦有高國內應故得先入立發兵距魯秋與魯戰于乾時魯兵敗走齊兵掩絕魯歸道齊遺魯書曰子糾兄弟弗忍誅請魯自殺之召忽管仲讎也請得而甘心醢之不然將圍魯魯人患之遂殺子糾于笙瀆召忽自殺管仲請囚桓公之立發兵攻魯心欲殺管仲鮑叔牙曰臣幸得從君君竟以立君之尊臣無以增君君將治齊卽高傒與叔牙足也君且欲霸王非管夷吾不可夷吾所居國國重不可失也於是桓公從之乃詳爲召管仲欲甘心實欲用之

管仲知之故請往鮑叔牙迎受管仲及堂阜而脫桎梏齋祓而見桓公桓公厚禮以爲大夫任政桓公既得管仲與鮑叔隰朋高傒修齊國政連五家之兵設輕重魚鹽之利以贍貧窮祿賢能齊人皆說二年伐滅邾邾子奔莒初桓公亡時過邾邾無禮故伐之五年伐魯魯將師敗魯莊公請獻遂邑以平桓公許與魯會柯而盟魯將盟曹沫以匕首劫桓公於壇上曰反魯之侵地桓公許之已而曹沫去匕首北面就臣位桓公後悔欲無與魯地而殺曹沫管仲曰夫劫許之而倍信殺之愈一小快耳而棄信於諸侯失天下之援不可於是遂與曹沫三敗所亡地於魯諸侯聞之皆信齊而欲附焉七年諸侯會桓公於甄而桓公於是始霸焉十四年陳厲公子完號敬仲來奔齊齊桓公欲以爲卿讓於是以爲工正田成子常之祖也二十三年山戎伐燕燕告急於齊齊桓公救燕遂伐山戎至于孤竹而還燕莊公遂送桓公入齊境桓公曰非天子諸侯相送不出境吾不可以無禮於燕於是分溝割燕君所至與燕命燕君復修召公之政納貢于周如成康之時諸侯聞之皆從齊二十七年魯潛公母曰哀姜桓公女弟也哀姜淫於魯公子慶父慶父弑潛公哀姜欲立慶父魯人更立釐



公桓公召哀姜殺之二十八年衛文公有狄亂告急於齊齊率諸侯城楚邱而立衛君二十九年桓公與夫人蔡姬戲船中蔡姬習水蕩公公懼止之不止出船怒歸蔡姬弗絕蔡亦怒嫁其女桓公聞而怒興師往伐三十年春齊桓公率諸侯伐蔡蔡潰遂伐楚楚成王興師問曰何故涉吾地管仲對曰昔召康公命我先君太公曰五侯九伯若實征之以夾輔周室賜我先君履東至海西至河南至穆陵北至無棣楚貢包茅不入王祭不共是以來責昭王南征不復是以來問楚王曰貢之不入有之寡人罪也敢不共乎昭王之出不復君其問之水濱齊師進次于陘夏楚王使屈完將兵扞齊齊師退次召陵桓公矜屈完以其衆屈完曰君以道則可若不則楚方城以爲城江漢以爲溝君安能進乎乃與屈完盟而去過陳陳袁濤塗詐齊令出東方覺秋齊伐陳是歲晉殺太子申生三十五年夏會諸侯于葵邱周襄王使宰孔賜桓公文武胙彤弓矢大路命無拜桓公欲許之管仲曰不可乃下拜受賜秋復會諸侯於葵邱益有驕色周使宰孔會諸侯頗有叛者晉侯病後遇宰孔宰孔曰齊侯驕矣第無行從之是歲晉獻公卒里克殺奚齊淖子奏穆公以夫人入公子夷吾爲晉君桓

公於是討晉亂至高梁使隰朋立晉君還是時周室微唯齊楚秦晉爲彊晉初與會  
獻公死國內亂秦穆公辟遠不與中國會盟楚成王初收荆蠻有之夷狄自置唯獨  
齊爲中國會盟而桓公能宣其德故諸侯賓會於是桓公稱曰寡人南伐至召陵望  
熊山北伐山戎離枝孤竹西伐大夏涉流沙束馬懸車登太行至卑耳山而還諸侯  
莫違寡人寡人兵車之會三乘車之會六九合諸侯一匡天下昔三代受命有何以  
異於此乎吾欲封泰山禪梁父管仲固諫不聽乃說桓公以遠方珍怪物至乃得封  
桓公乃止三十八年周襄王弟帶與戎翟合謀伐周齊使管仲平戎於周周欲以上  
卿禮管仲管仲頓首曰臣陪臣安敢三讓乃受下卿禮以見三十九年周襄王弟帶  
來奔齊齊使仲孫請王爲帶謝襄王怒弗聽四十一年秦穆公虜晉惠公復歸之是  
歲管仲隰朋皆卒管仲病桓公問曰羣臣誰可相者管仲曰知臣莫如君公曰易牙  
如何對曰殺子以適君非人情不可公曰開方如何對曰倍親以適君非人情難近  
公曰豎刁如何對曰自宮以適君非人情難親管仲死而桓公不用管仲言卒近用  
三子三子專權四十二年戎伐周周告急於齊齊令諸侯各發卒戍周是歲晉公子

重耳來桓公妻之四十三年初齊桓公之夫人三曰王姬徐姬蔡姬皆無子桓公好內多內寵如夫人者六人長衛姬生無詭少衛姬生惠公元鄭姬生孝公昭葛嬴生昭公潘密姬生懿公商人宋華子生公子雍桓公與管仲屬孝公於宋襄公以爲太子雍巫有寵於衛共姬因宦者豎刁以厚獻於桓公亦有寵桓公許之立無詭管仲卒五公子皆求立冬十月乙亥齊桓公卒易牙入與豎刁因內寵殺羣吏而立公子無詭爲君太子昭奔宋桓公病五公子各樹黨爭立及桓公卒遂相攻以故宮中空莫敢棺桓公尸在牀上六十七日尸蟲出于戶十二月乙亥無詭立乃棺赴辛巳夜歛殯桓公十有餘子要其後立者五人無詭立三月死無諡次孝公次昭公次懿公次惠公孝公元年三月宋襄公率諸侯兵送齊太子昭而伐齊齊人恐殺其君無詭齊人將立太子昭四公子之徒攻太子太子走宋宋遂與齊人四公子戰五月宋敗齊四公子師而立太子昭是爲齊孝公宋以桓公與管仲屬之太子故來征之以亂故八月乃葬齊桓公六年春齊伐宋以其不同盟于齊也夏宋襄公卒七年晉文公立十年孝公卒孝公弟潘因衛公子開方殺孝公子而立潘是爲昭公昭公桓公子

也其母曰葛嬴昭公元年晉文公敗楚於城濮而會諸侯踐土朝周天子使晉稱伯六年翟侵齊晉文公卒秦兵敗於殺十二年秦穆公卒十九年五月昭公卒子舍立爲齊君舍之母無寵於昭公國人莫畏昭公之弟商人以桓公死爭立而不得陰交賢士附愛百姓百姓說及昭公卒子舍立孤弱卽與衆十月卽墓上弑齊君舍而商人自立是爲懿公懿公桓公子也其母曰密姬懿公四年春初懿公爲公子時與丙戎之父獵爭獲不勝及卽位斷丙戎父足而使丙戎僕庸職之妻好公內之宮使庸職驂乘五月懿公游於申池二人浴戲職曰斷足子戎曰奪妻者二人俱病此言乃怨謀與公游竹中二人弑懿公車上棄竹中而亡去懿公之立驕民不附齊人廢其子而迎公子元於衛立之是爲惠公惠公桓公子也其母衛女曰少衛姬避齊亂故在衛惠公二年長翟來王子城父攻殺之埋之於北門晉趙穿弑其君靈公十年惠公卒子頃公無野立初崔杼有寵於惠公惠公卒高國畏其偪也逐之崔杼奔衛頃公元年楚莊王彊伐陳二年圍鄭鄭伯降已復國鄭伯六年春晉使卻克於齊齊使夫人帷中而觀之卻克上夫人笑之卻克曰不是報不復涉河歸請伐齊晉侯弗許

齊使至晉郤克執齊使者四人河內殺之八年晉伐齊齊以公子彊質晉晉兵去十年春齊伐魯衛魯衛大夫如晉請師皆因郤克晉使郤克以車八百乘爲中軍將士燮將上軍欒書將下軍以救魯衛伐齊六月壬申與齊侯兵合靡笄下癸酉陳于鞌逢丑父爲齊頃公右頃公曰馳之破晉軍會食射傷郤克流血至履克欲還入壁其御曰我始入再傷不敢言疾恐懼士卒願子忍之遂復戰戰齊急丑父恐齊侯得乃易處頃公爲右車絀於木而止晉小將韓厥伏齊侯車前曰寡君使臣救魯衛戲之丑父使頃公下取飲因得亡脫去入其軍晉郤克欲殺丑父丑父曰代君死而見僇後人臣無忠其君者矣克舍之丑父遂得亡歸齊於是晉軍追齊至馬陵齊侯請以寶器謝不聽必得笑克者蕭桐叔子令齊東畝對曰叔子齊君母齊君母亦猶晉君母子安置之且子以義伐而以暴爲後其可乎於是乃許令反魯衛之侵地十一年晉初置六卿賞鞌之功齊頃公朝晉欲尊王晉景公晉景公不敢受乃歸歸而頃公弛苑囿薄賦歛振孤問疾虛積聚以救民民亦大說厚禮諸侯竟頃公卒百姓附諸侯不犯十七年頃公卒子靈公環立靈公九年晉欒書弒其君厲公十年晉悼公伐

齊齊令公子光質晉十九年立子光爲太子高厚傅之令會諸侯盟於鍾離二十七年晉使中行獻子伐齊齊師敗靈公走入臨菑晏嬰止靈公靈公弗從曰君亦無勇矣晉兵遂圍臨菑臨菑城守不敢出晉焚郭中而去二十八年初靈公取魯女生子光以爲太子仲姬戎姬戎姬嬖仲姬生子牙屬之戎姬戎姬請以爲太子公許之仲姬曰不可光之立列於諸侯矣今無故廢之君必悔之公曰在我耳遂東太子光使高厚傅牙爲太子靈公疾崔杼迎故太子光而立之是爲莊公莊公殺戎姬五月壬辰靈公卒莊公卽位執太子牙於句瀆之邱殺之八月崔杼殺高厚晉聞齊亂伐齊至高唐莊公三年晉大夫欒盈奔齊莊公厚客待之晏嬰田文子諫公弗聽四年齊莊公使欒盈間入晉曲沃爲內應以兵隨之上太行入孟門欒盈敗齊兵還取朝歌六年初棠公妻好棠公死崔杼取之莊公通之數如崔氏以崔杼之冠賜人侍者曰不可崔杼怒因其伐晉欲與晉合謀襲齊而不得閒莊公嘗筮宦者賈舉舉復侍爲崔杼間公以報怨五月莒子朝齊齊以甲戌饗之崔杼稱病不視事乙亥公問崔杼病遂從崔杼妻崔杼妻入室與崔杼自閉戶不出公擁柱而歌宦者賈舉遮公從

官而入閉門崔杼之徒持兵從中起公登臺而請解不許請盟不許請自殺於廟不許皆曰君之臣杼疾病不能聽命近於公宮陪臣爭趣有淫者不知二命公踰牆射中公股公反墜遂弑之晏嬰立崔杼門外曰君爲社稷死則死之爲社稷亡則亡之若爲己死己亡非其私暱誰敢任之門開而入枕公尸而哭三踊而出人謂崔杼必殺之崔杼曰民之望也舍之得民丁丑崔杼立莊公異母杵臼是爲景公景公母魯叔孫宣伯女也景公立以崔杼爲右相慶封爲左相二相恐亂起乃與國人盟曰不與崔慶者死晏子仰天曰嬰所不獲唯忠於君利社稷者是從不肯盟慶封欲殺晏子崔杼曰忠臣也舍之齊太史書曰崔杼弑莊公崔杼殺之其弟復書崔杼復殺之少弟復書崔杼乃舍之景公元年初崔杼生子成及彊其母死取東郭女生明東郭女使其前夫子無咎與其弟偃相崔氏成有罪二相急治之立明爲太子成請老於崔杼崔杼許之二相弗聽曰崔宗邑不可成彊怒告慶封慶封與崔杼有郤欲其敗也成彊殺無咎偃於崔杼家家皆奔亡崔杼怒無人使一宦者御見慶封慶封曰請爲子誅之使崔杼仇盧蒲嬖攻崔氏殺成彊盡滅崔氏崔氏婦自殺崔杼無歸亦

自殺慶封爲相國專權三年十月慶封出獵初慶封已殺崔杼益驕嗜酒好獵不聽政令慶舍用政已有內郤田文子謂桓子曰亂將作田鮑高欒氏相與謀慶氏慶舍發甲圍慶封宮四家徒共擊破之慶封還不得入奔魯齊人讓魯封奔吳吳與之朱方聚其族而居之富於在齊其秋齊人徙葬莊公僂崔杼尸於市以說衆九年景公使晏嬰之晉與叔向私語曰齊政卒歸田氏田氏雖無大德以公權私有德於民民愛之十二年景公如晉見平公欲與伐燕十八年公復如晉見昭公二十六年獵魯郊因入魯與晏嬰俱問魯禮三十一年魯昭公辟季氏難奔齊齊欲以于社封之子家止昭公昭公乃請齊伐魯取鄆以居昭公三十二年彗星見景公坐栢寢嘆曰堂堂誰有此乎羣臣皆泣晏子笑公怒晏子曰臣笑羣臣諛甚景公曰彗星出東北當齊分野寡人以爲憂晏子曰君高臺深池賦歛如弗得刑罰恐弗勝彗星將出彗星何懼乎公曰可禳否晏子曰使神可祝而來亦可禳而去也百姓苦怨以萬數而君令一人禳之安能勝衆口乎是時景公好治宮室聚狗馬奢侈厚賦重刑故晏子以此諫之四十二年吳王闔閭伐楚入郢四十七年魯陽虎攻其君不勝奔齊請齊伐



魯鮑子諫景公乃囚陽虎陽虎得亡奔晉四十八年與魯定公好會夾谷犁鉏曰孔丘知禮而怯請令萊人爲樂因執魯君可得志景公害孔丘相魯懼其霸故從犁鉏之計方會進萊樂孔子歷階上使有司執萊人斬之以禮讓景公景公慙乃歸魯侵地以謝而罷去是歲晏嬰卒五十五年范中行反其君於晉晉攻之急來請粟田乞欲爲亂樹黨於逆臣說景公曰范中行數有德於齊不可不救乃使乞救而輸之粟五十八年夏景公夫人燕姬適子死景公寵妾芮姬生子荼荼少其母賤無行諸大夫恐其爲嗣乃言願擇諸子長賢者爲太子景公老惡言嗣事又愛荼母欲立之憚發之口乃謂諸大夫曰爲樂耳國何患無君乎秋景公病命國惠子高昭子立少子荼爲太子逐羣公子遷之萊景公卒太子荼立是爲晏孺子冬未葬而羣公子畏誅皆出亡荼諸異母兄公子壽駒駘奔衛公子駟陽生奔魯萊人歌之曰景公死乎弗與埋三軍事乎弗與謀師乎師乎胡黨之乎晏孺子元年春田乞僞事高國者每朝乞驂乘言曰子得君大夫皆自危欲謀作亂又謂諸大夫曰高昭子可畏及未發先之大夫從之六月田乞鮑牧乃與大夫以兵入公宮攻高昭子昭子聞之與國惠子

救公公師敗田乞之徒追之國惠子奔莒遂反殺高昭子晏圍奔魯八月齊秉意茲田乞敗二相乃使人之魯召公子陽生陽生至齊私匿田乞家十月戊子田乞請諸大夫曰常之母有魚菽之祭幸來會飲會飲田乞盛陽生橐中置坐中央發橐出陽生曰此乃齊君矣大夫皆伏謁將與大夫盟而立之鮑牧醉乞誣大夫曰吾與鮑牧謀共立陽生鮑牧怒曰子忘景公之命乎諸大夫相視欲悔陽生前頓首曰可則立之否則已鮑牧恐禍起乃復曰皆景公子也何爲不可乃與盟立陽生是爲悼公悼公入宮使人遷晏孺子於駘殺之幕下而逐孺子母芮子芮子故賤而孺子少故無權國人輕之悼公元年齊伐魯取讙闡初陽生亡在魯季康子以其妹妻之及歸卽位使迎之季姬與季魴侯通言其情魯弗敢與故齊伐魯竟迎季姬季姬嬖齊復歸魯侵地鮑子與悼公有郤不善四年吳魯伐齊南方鮑子弑悼公赴于吳吳王夫差哭於軍門外三日將從海入討齊齊人敗之吳師乃去晉趙鞅伐齊至賴而去齊人共立悼公子壬是爲簡公簡公四年春初簡公與父陽生俱在魯也闕止有寵焉及卽位使爲政田成子憚之驟顧於朝御鞅言簡公曰田闕不可並也君其擇焉弗聽

子我夕田逆殺人逢之遂捕以入田氏方睦使囚病而遺守囚者酒醉而殺守者得  
亡子我盟諸田於陳宗初田豹欲爲子我臣使公孫言豹豹有喪而止後卒以爲臣  
幸於子我子我謂曰吾盡逐田氏而立女可乎對曰我遠田氏矣且其違者不過數  
人何盡逐焉遂告田氏子行曰彼得君弗先必禍子子行舍於公宮夏五月壬申成  
子兄弟四乘如公子我在幄出迎之遂入閉門宦者禦之子行殺宦者公與婦人飲  
酒于檀臺成子遷諸寢公執戈將擊之大史子餘曰非不利也將除害也成子出舍  
于庫聞公猶怒將出曰何所無君子行拔劍曰需事之賊也誰非田宗所不殺子者  
有如田宗乃止子我歸屬徒攻闢與大門皆弗勝乃出田氏追之豐丘人執子我以  
告殺之郭關成子將殺大陸子方田逆請而免之以公命取車於道出雍門田豹與  
之車弗受曰逆爲余請豹與余車余有私焉事子我而有私於其讎何以見魯衛之  
士庚辰田常執簡公于徐州公曰余蚤從御鞅言不及此甲午田常弑簡公于徐州  
田常乃立簡公弟騫是爲平公平公卽位田常相之專齊之政割齊安平以東爲田  
氏封邑平公八年越滅吳二十五年卒子宣公積立宣公五十一年卒子康公貸立

田會反廩丘康公二年韓魏趙始列爲諸侯十九年田常曾孫田和始爲諸侯遷康公海濱二十六年康公卒呂氏遂絕其祀田氏卒有齊國爲齊威王彊於天下

魯周公世家 史記

周公旦者周武王弟也自文王在時旦爲子孝篤仁異於羣子及武王卽位旦常輔翼武王用事居多武王九年東伐至盟津周公輔行十一年伐紂至牧野周公佐武王作牧誓破殷入商宮已殺紂周公把大鉞召公把小鉞以夾武王釁社告紂之罪于天及殷民釋箕子之囚封紂子武庚祿父使管叔蔡叔傅之以續殷祀徧封功臣同姓戚者封周公旦於少昊之虛曲阜是爲魯公周公不就封留佐武王武王克殷二年天下未集武王有疾不豫羣臣懼太公召公乃繆卜周公曰未可以戚我先王周公於是乃自以爲質設三壇周公北面立戴璧秉圭告于大王王季文王史策祝曰惟爾元孫王發勤勞阻疾若爾三王是有負子之責於天以旦代王發之身旦巧能多材多藝能事鬼神乃王發不如旦多材多藝不能事鬼神乃命于帝庭敷佑四方用能定汝子孫于下地四方之民罔不敬畏無墜天之降葆命我先王亦永有所

依歸今我其卽命於元龜爾之許我我其以璧與圭歸以俟爾命爾不許我我乃屏璧與圭周公已令史策告大王王季文王欲代武王發於是乃卽三王而卜卜人皆曰吉發書視之信吉周公喜開籥乃見書遇吉周公入賀武王曰王其無害且新受命三王維長終是圖茲道能念予一人周公藏其策金縢匱中誠守者勿敢言明日武王有瘳其後武王旣崩成王少在強葆之中周公恐天下聞武王崩而畔周公乃踐阼代成王攝行政當國管叔及其羣弟流言於國曰周公將不利於成王周公乃告太公望召公奭曰我之所以弗辟而攝行政者恐天下畔周無以告我先王大王王季文王三王之憂勞天下久矣於今而后成武王蚤終成王少將以成周我所以爲之若此於是卒相成王而使其子伯禽代就封於魯周公戒伯禽曰我文王之子武王之弟成王之叔父我於天下亦不賤矣然我一沐三握髮一飯三吐哺起以待士猶恐失天下之賢人子之魯慎無以國驕人管蔡武庚等果率淮夷而反周公乃奉成王命興師東伐作大誥遂誅管叔殺武庚放蔡叔收殷餘民以封康叔於衛封微子於宋以奉殷祀寧淮夷東土二年而畢定諸侯咸服宗周天降祉福唐叔得禾

異母同穎獻之成王成王命唐叔以餽周公於東土作餽禾周公既受命禾嘉天子命作嘉禾東土以集周公歸報成王乃爲詩貽王命之曰鷓鴣王亦未敢訓周公成王七年二月乙未王朝步自周至豐使太保召公先之雒相土其三月周公往營成周雒邑卜居焉曰吉遂國之成王長能聽政於是周公乃還政於成王成王臨朝周公之代成王治南面倍依以朝諸侯及七年後還政成王北面就臣位躬躬如畏然初成王少時病周公乃自揃其蚤沈之河以祝於神曰王少未有識奸神命者乃且也亦藏其策於府成王病有瘳及成王用事人或譖周公周公奔楚成王發府見周公禱書乃泣反周公周公歸恐成王壯治有所淫佚乃作多士作毋逸毋逸稱爲人父母爲業至長久子孫驕奢忘之以亡其家爲人子可不慎乎故昔在殷王中宗嚴恭敬畏天命自度治民震懼不敢荒寧故中宗饗國七十五年其在高宗久勞于外爲與小人作其卽位乃有亮闇三年不言言乃謹不敢荒寧密靖殷國至于小大無怨故高宗饗國五十五年其在祖甲不義惟王久爲小人于外知小人之依能保施小民不侮鰥寡故祖甲饗國三十三年多士稱曰自湯至于帝乙無不率祀明德帝

無不配天者在今後嗣王紂誕淫厥佚不顧天及民之從也其民皆可誅周多士文  
王日中昃不暇食饗國五十年作此以誠成王成王在豐天下已安周之官政未次  
序於是周公作周官官別其宜作立政以便百姓百姓說周公在豐病將沒曰必葬  
我成周以明吾不敢離成王周公既卒成王亦讓葬周公於畢從文王以明予小子  
不敢臣周公也周公卒後秋未穫暴風雷雨禾盡偃大木盡拔周國大恐成王與大  
夫朝服以開金縢書王乃得周公所自以爲功代武王之說二公及王乃問史百執  
事史百執事曰信有昔周公命我勿敢言成王執書以泣曰自今後其無繆卜乎昔  
周公勤勞王家惟予幼人弗及知今天動威以彰周公之德惟朕小子其迎我國家  
禮亦宜之王出郊天乃雨反風禾盡起二公命國人凡大木所偃盡起而築之歲則  
大熟於是成王乃命魯得郊祭文王魯有天子禮樂者以襲周公之德也周公卒子  
伯禽固已前受封是爲魯公魯公伯禽之初受封之魯三年而後報政周公周公曰  
何遲也伯禽曰變其俗革其禮喪三年然後除之故遲大公亦封於齊五月而報政  
周公周公曰何疾也曰吾簡其君臣禮從其俗爲也及後聞伯禽報政遲乃歎曰嗚

呼魯後世其北面事齊矣夫政不簡不易民不有近平易近民民必歸之伯禽卽位之後有管蔡等反也淮夷徐戎亦並興反於是伯禽率師伐之於盼作盼誓曰陳爾甲冑無敢不善無敢傷牯馬牛其風臣妾逋逃勿敢越逐敬復之無敢寇攘踰牆垣魯人三郊三隧峙爾芻茭糗糧植榦無敢不逮我甲戌築而征徐戎無敢不及有大刑作此盼誓遂平徐戎定魯魯公伯禽卒子考公酋立考公四年卒立弟熙是謂煬公煬公築茅闕門六年卒子幽公宰立幽公十四年幽公弟潰殺幽公而自立是爲魏公魏公五十年卒子厲公擢立厲公三十七年卒魯人立其弟具是爲獻公獻公三十二年卒子眞公濞立眞公十四年周厲王無道出奔彘共和行政二十九年周宣王卽位三十年眞公卒弟敖立是爲武公武公九年春武公與長子括少子戲西朝周宣王宣王愛戲欲立戲爲魯太子周之樊仲山父諫宣王曰廢長立少不順不順必犯王命犯王命必誅之故出令不可不順也令之不行政之不立行而不順民將弃上夫下事上少事長所以爲順今天子建諸侯立其少是教民逆也若魯從之諸侯效之王命將有所壅若弗從而誅之是自誅王命也誅之亦失不誅亦失王其



圖之宣王弗聽卒立戲爲魯太子夏武公歸而卒戲立是爲懿公懿公九年懿公兄括之子伯御與魯人攻弑懿公而立伯御爲君伯御卽位十一年周宣王伐魯殺其君伯御而問魯公子能道順諸侯者以爲魯後樊穆仲曰魯懿公弟稱肅恭明神敬事耆老賦事行刑必問於遺訓而咨於固實不干所問不犯所知宣王曰然能訓治其民矣乃立稱於夷宮是爲孝公自是後諸侯多畔王命孝公二十五年諸侯畔周犬戎殺幽王秦始列爲諸侯二十七年孝公卒子弗湟立是爲惠公惠公三十年晉人弑其君昭侯四十五年晉人又弑其君孝侯四十六年惠公卒長庶子息攝當國行君事是爲隱公初惠公適夫人無子公賤妾聲子生子息息長爲娶於宋宋女至而好惠公奪而自妻之生子允登宋女爲夫人以允爲太子及惠公卒爲允少故魯人共令息攝政不言卽位隱公五年觀漁於棠八年與鄭易天子之太山之邑祊及許田君子譏之十一年冬公子揮諂謂隱公曰百姓便君君其遂立吾請爲君殺子允君以我爲相隱公曰有先君命吾爲允少故攝代今允長矣吾方營菟裘之地而老焉以授子允政揮懼子允聞而反誅之乃反譖隱公於子允曰隱公欲遂立去子

子其圖之請爲子殺隱公子允許諾十一月隱公祭鍾巫齊于社圃館于蔦氏揮使人弑隱公于蔦氏而立子允爲君是爲桓公桓公元年鄭以璧易天子之許田二年以宋之賂鼎入於太廟君子饑之三年使揮迎婦于齊爲夫人六年夫人生子與桓公同日故名曰同同長爲太子十六年會于曹伐鄭入厲公十八年春公將有行遂與夫人如齊申繻諫止公公不聽遂如齊齊襄公通桓公夫人公怒夫人夫人以告齊侯夏四月丙子齊襄公饗公公醉使公子彭生抱魯桓公因命彭生摺其脅公死于車魯人告于齊曰寡君畏君之威不敢寧居來修好禮禮成而不反無所歸咎請得彭生以除醜於諸侯齊人殺彭生以說魯立太子同是爲莊公莊公母夫人因留齊不敢歸魯莊公五年冬伐衛內衛惠公八年齊公子糾來奔九年魯欲內子糾於齊後桓公桓公發兵擊魯魯急殺子糾召忽死齊告魯生致管仲魯人施伯曰齊欲得管仲非殺之也將用之用之則爲魯患不如殺以其屍與之莊公不聽遂囚管仲與齊齊人相管仲十三年魯莊公與曹沫會齊桓公於柯曹沫劫齊桓公求魯侵地已盟而釋桓公桓公欲背約管仲諫卒歸魯侵地十五年齊桓公始霸二十三年莊

公如齊觀社三十二年初莊公築臺臨黨氏見孟女說而愛之許立爲夫人割臂以盟孟女生子斑斑長說梁氏女往觀圉人犖自牆外與梁氏女戲斑怒鞭犖莊公聞之曰犖有力焉遂殺之是未可鞭而置也斑未得殺會莊公有疾莊公有三弟長曰慶父次曰叔牙次曰季友莊公取齊女爲夫人曰哀姜哀姜無子哀姜娣曰叔姜生子開莊公無適嗣愛孟女欲立其子斑莊公病而問嗣於弟叔牙叔牙曰一繼一及魯之常也慶父在可爲嗣君何憂莊公患叔牙欲立慶父退而問季友季友曰請以死立斑也莊公曰曩者叔牙欲立慶父奈何季友以莊公命命叔牙待於鍼巫氏使鍼季劫飲叔牙以鳩曰飲此則有後奉祀不然死且無後牙遂飲鳩而死魯立其子爲叔孫氏八月癸亥莊公卒季友竟立子斑爲君如莊公命侍喪舍于黨氏先時慶父與哀姜私通欲立哀姜娣子開及莊公卒而季友立斑十月己未慶父使圉人犖殺魯公子斑於黨氏季友犇陳慶父竟立莊公子開是爲湣公湣公二年慶父與哀姜通益甚哀姜與慶父謀殺湣公而立慶父慶父使卜齮襲殺湣公於武闈季友聞之自陳與湣公弟申如邾請魯求內之魯人欲誅慶父慶父恐奔莒於是季友奉子

申入立之是爲釐公釐公亦莊公少子哀姜恐奔邾季友以賂如莒求慶父慶父歸使人殺慶父慶父請奔弗聽乃使大夫奚斯行哭而往慶父聞奚斯言乃自殺齊桓公聞哀姜與慶父亂以危魯乃召之邾而殺之以其屍歸戮之魯魯釐公請而葬之季友母陳女故亡在陳陳故佐送季友及子申季友之將生也父魯桓公使人卜之曰男也其名曰友間于兩社爲公室輔季友亡則魯不昌及生有文在掌曰友遂以名之號爲成季其後爲季氏慶父後爲孟氏也釐公元年以汶陽鄆封季友季友爲相九年晉里克殺其君奚齊卓子齊桓公率釐公討晉亂至高梁而還立晉惠公十七年齊桓公卒二十四年晉文公卽位三十三年釐公卒子興立是爲文公文公元年楚太子商臣弑其父成王代立三年文公朝晉襄公十一年十月甲午魯敗翟于鹹獲長翟喬如富父終甥春其喉以戈殺之埋其首於子駒之門以命宣伯初宋武公之世鄭瞞伐宋司徒皇父帥師禦之以敗翟于長丘獲長翟緣斯晉之滅路獲喬如弟棼如齊惠公二年鄭瞞伐齊齊王子城父獲其弟榮如埋其首於北門衛人獲其季弟簡如鄭瞞由是遂亡十五年季文子使於晉十八年二月文公卒文公有二

妃長妃齊女哀姜生子惡及視次妃敬嬴嬖愛生子倭倭私事襄仲襄仲欲立之叔仲曰不可襄仲請齊惠公惠公新立欲親魯許之冬十月襄仲殺子惡及視而立倭是爲宣公哀姜歸齊哭而過市曰天乎襄仲爲不道殺適立庶市人皆哭魯人謂之哀姜魯由此公室卑三桓彊宣公倭十二年楚莊王彊圍鄭鄭伯降復國之十八年宣公卒子成公黑肱立是爲成公季文子曰使我殺適立庶失大援者襄仲襄仲立宣公公孫歸父有寵宣公欲去三桓與晉謀伐三桓會宣公卒季文子怨之歸父奔齊成公二年春齊伐取我隆夏公與晉卻克敗齊頃公於鞏齊復歸我侵地四年成公如晉晉景公不敬魯魯欲背晉合於楚或諫乃不十年成公如晉晉景公卒因留成公送葬魯諱之十五年始與吳王壽夢會鍾離十六年宣伯告晉欲誅季文子文子有義晉人弗許十八年成公卒子午立是爲襄公是時襄公三歲也襄公元年晉立悼公往年冬晉欒書弑其君厲公四年襄公朝晉五年季文子卒家無衣帛之妾廡無食粟之馬府無金玉以相三君君子曰季文子廉忠矣九年與晉伐鄭晉悼公冠襄公於衛季武子從相行禮十一年三桓氏分爲三軍十二年朝晉十六年晉平

公卽位二十一年朝晉平公二十二年孔丘生二十五年齊崔杼弑其君莊公立其弟景公二十九年吳延陵季子使魯問周樂盡知其意魯人敬焉三十一年六月襄公卒其九月太子卒魯人立齊歸之子禰爲君是爲昭公昭公年十九猶有童心穆叔不欲立曰太子死有母弟可立不卽立長年鈞擇賢義鈞則卜之今禰非適嗣且又居喪意不在戚而有喜色若果立必爲季氏憂季武子弗聽卒立之比及葬三易衰君子曰是不終也昭公三年朝晉至河晉平公謝還之魯恥焉四年楚靈王會諸侯於申昭公稱病不往七年季武子卒八年楚靈王就章華臺召昭公昭公往賀賜昭公寶器已而悔復詐取之十二年朝晉至河晉平公謝還之十三年楚公子棄疾弑其君靈王代立十五年朝晉晉留之葬晉昭公魯恥之二十年齊景公與晏子狩竟因入魯問禮二十一年朝晉至河晉謝還之二十五年春鸚鵡來巢師己曰文成之世童謠曰鸚鵡來巢公在乾侯鸚鵡入處公在外野季氏與郈氏鬪雞季氏芥雞羽郈氏金距季平子怒而侵郈氏郈昭伯亦怒平子臧昭伯之弟會僞讒臧氏匿季氏臧昭伯囚季氏人季平子怒囚臧氏老臧郈氏以難告昭公昭公九月戊戌伐季

氏遂入平子登臺請曰君以讒不察臣罪誅之請遷沂上弗許請囚於鄆弗許請以五乘亡弗許子家駒曰君其許之政自季氏久矣爲徒者衆衆將合謀弗聽郈氏曰必殺之叔孫氏之臣展謂其衆曰無季氏與有孰利皆曰無季氏是無叔孫氏展曰然救季氏遂敗公師孟懿子聞叔孫氏勝亦殺郈昭伯郈昭伯爲公使故孟氏得之三家共伐公公遂奔己亥公至于齊齊景公曰請致千社待君子家曰弃周公之業而臣於齊可乎乃止子家曰齊景公無信不如早之晉弗從叔孫見公還見平子平子頓首初欲迎昭公孟孫季孫後悔乃止二十六年春齊伐魯取鄆而居昭公焉夏齊景公將內公令無受魯賂申豐汝賈許齊臣高齮子將粟五千庾子將言於齊侯曰羣臣不能事魯君有異焉宋元公爲魯如晉求內之道卒叔孫昭子求內其君無病而死不知天弃魯乎抑魯君有罪于鬼神也願君且待齊景公從之二十八年昭公如晉求入季平子私於晉六卿六卿受季氏賂諫晉君晉君乃止居昭公乾侯二十九年昭公如鄆齊景公使人賜昭公書自謂主君昭公恥之怒而去乾侯三十一年晉欲內昭公召季平子平子布衣跣行因六卿謝罪六卿爲言曰晉欲內昭公衆

不從晉人止三十二年昭公卒於乾侯魯人共立昭公弟宋爲君是爲定公定公立  
趙簡子問史墨曰季氏亡乎史墨對曰不亡季友有大功於魯受鄆爲上卿至于文  
子武子世增其業魯文公卒東門遂殺適立庶魯君於是失國政政在季氏於今四  
君矣民不知君何以得國是以爲君慎器與名不可以假人定公五年季平子卒陽  
虎私怒因季桓子與盟乃捨之七年齊伐我取鄆以爲魯陽虎邑以從政八年陽虎  
欲盡殺三桓適而更立其所善庶子以代之載季桓子將殺之桓子詐而得脫三桓  
共攻陽虎陽虎居陽關九年魯伐陽虎陽虎奔齊已而奔晉趙氏十年定公與齊景  
公會於夾谷孔子行相事齊欲襲魯君孔子以禮歷階誅齊淫樂齊侯懼乃止歸魯  
侵地而謝過十二年使仲由毀三桓城收其甲兵孟氏不肯墮城伐之不克而止季  
桓子受齊女樂孔子去十五年定公卒子將立是爲哀公哀公五年齊景公卒六年  
齊田乞弒其君孺子七年吳王夫差彊伐齊至緡徵百牢於魯季康子使子貢說吳  
王及太宰嚭以禮誦之吳王曰我文身不足責禮乃止八年吳爲鄒伐魯至城下盟  
而去齊伐我取三邑十年伐齊南邊十二年齊伐魯季氏用冉有有功思孔子孔子



自衛歸魯十四年齊田常弑其君簡公於徐州孔子請伐之哀公不聽十五年使子服景伯子貢爲介適齊齊歸我侵地田常初相欲親諸侯十六年孔子卒二十二年越王勾踐滅吳王夫差二十七年春季康子卒夏哀公患三桓將欲因諸侯以劫之三桓亦患公作難故君臣多間公游于陵阪遇孟武伯於衢曰請問余及死乎對曰不知也公欲以越伐三桓八月哀公如陘氏三桓攻公公奔于衛去如鄒遂如越國人迎哀公復歸卒于有山氏子寧立是爲悼公悼公之時三桓勝魯如小侯畀於三桓之家十三年三晉滅智伯分其地有之三十七年悼公卒子嘉立是爲元公元公二十一年卒子顯立是爲穆公穆公三十三年卒子奮立是爲共公公二十二年卒子屯立是爲康公康公九年卒子匱立是爲景公景公二十九年卒子叔立是爲平公是時六國皆稱王平公十二年秦惠王卒三十二年平公卒子賈立是爲文公文公七年楚懷王死于秦二十三年文公卒子雝立是爲頃公頃公二年秦拔楚之郢楚頃王東徙于陳十九年楚伐我取徐州二十四年楚考烈王伐滅魯頃公亡遷於下邑爲家人魯絕祀頃公卒于柯魯起周公至頃公凡三十四世

衛康叔世家 史記

衛康叔名封周武王同母少弟也其次尙有冉季冉季最少武王已克殷紂復以殷餘民封紂子武庚祿父比諸侯以奉其先祀勿絕爲武庚未集恐其有賊心武王乃令其弟管叔蔡叔傅相武庚祿父以和其民武王既崩成王少周公旦代成王治當國管叔蔡叔疑周公乃與武庚祿父作亂欲攻成周周公旦以成王命興師伐殷殺武庚祿父管叔放蔡叔以武庚餘民封康叔爲衛君居河淇間故商墟周公旦懼康叔齒少乃申告康叔曰必求殷之賢人君子長者問其先殷所以興所以亡而務愛民告以紂所以亡者以淫於酒酒之失婦人是用故紂之亂自此始爲梓材示君子可法則故謂之康誥酒誥梓材以命之康叔之國旣以此命能和集其民民大說成王長用事舉康叔爲周司寇賜衛寶祭器以章有德康叔卒子康伯代立康伯卒子孝伯立孝伯卒子嗣伯立嗣伯卒子康伯立康伯卒子靖伯立靖伯卒子貞伯立貞伯卒子頌侯立頌侯厚賂周夷王夷王命衛爲侯頌侯立十二年卒子釐侯立釐侯十三年周厲王出奔于彘共和行政焉二十八年周宣王立四十二年釐侯卒太

子共伯餘立爲君共伯弟和有寵於釐侯多予之賂和以其賂賂士以襲攻共伯於墓上共伯入釐侯羨自殺衛人因葬之釐侯旁諡曰共伯而立和爲衛侯是爲武公武公卽位修康叔之政百姓和集四十二年犬戎殺周幽王武公將兵往佐周平戎甚有功周平王命武公爲公五十五年卒子莊公楊立莊公五年取齊女爲夫人好而無子又取陳女爲夫人生子蚤死陳女女弟亦幸於莊公而生子完完母死莊公令夫人齊女子之立爲太子莊公有寵妾生子州吁十八年州吁長好兵莊公使將石碯諫莊公曰庶子好兵使將亂自此起不聽二十三年莊公卒太子完立是爲桓公桓公二年弟州吁驕奢桓公絀之州吁出奔十三年鄭伯弟段攻其兄不勝亡而州吁求與之友十六年州吁收聚衛亡人以襲殺桓公州吁自立爲衛君爲鄭伯弟段欲伐鄭請宋陳蔡與俱三國皆許州吁州吁新立好兵弑桓公衛人皆不愛石碯乃因桓公母家於陳詳爲善州吁至鄭郊石碯與陳侯共謀使右宰醜進食因殺州吁于濮而迎桓公弟晉於邢而立之是爲宣公宣公七年魯弑其君隱公九年宋督弑其君殤公及孔父十年晉曲沃莊伯弑其君哀侯十八年初宣公愛夫人夷姜夷

姜生子伋以爲太子而令右公子傅之右公子爲太子取齊女未入室而宣公見所欲爲太子婦者好說而自取之更爲太子取他女宣公得齊女生子壽子朔令左公子傅之太子伋母死宣公正夫人與朔共讒惡太子伋宣公自以其奪太子妻也心惡太子欲廢之及聞其惡大怒乃使太子伋於齊而令盜遮界上殺之與太子白旄而告界盜見持白旄者殺之且行子朔之兄壽太子異母弟也知朔之惡太子而君欲殺之乃謂太子曰界盜見太子白旄卽殺太子太子可毋行太子曰逆父命求生不可遂行壽見太子不止乃盜其白旄而先馳至界界盜見其驗卽殺之壽已死而太子伋又至謂盜曰所當殺乃我也盜并殺太子伋以報宣公宣公乃以子朔爲太子十九年宣公卒太子朔立是爲惠公左右公子不平朔之立也惠公四年左右公子怨惠公之讒殺前太子伋而代立乃作亂攻惠公立太子伋之弟黔牟爲君惠公犇齊衛君黔牟立八年齊襄公率諸侯奉王命共伐衛納惠公誅左右公子衛君黔牟犇于周惠公復立惠公立三年出亡亡八年復入與前通年凡十三年矣二十五年惠公怨周之容舍黔牟與燕伐周周惠王犇溫衛燕立惠王弟頹爲王二十九年

鄭復納惠王三十一年惠公卒子懿公赤立懿公卽位好鸚淫樂奢侈九年翟伐衛衛懿公欲發兵兵或畔大臣言曰君好鸚鸚可令擊翟翟於是遂入殺懿公懿公之立也百姓大臣皆不服自懿公父惠公朔之讒殺太子伋代立至於懿公常欲敗之卒滅惠公之後而更立黔牟之弟昭伯頑之子申爲君是爲戴公戴公申元年卒齊桓公以衛數亂乃率諸侯伐翟爲衛築楚邱立戴公弟燬爲衛君是爲文公文公以亂故彝齊齊人入之初翟殺懿公也衛人憐之思復立宣公前死太子伋之後伋子又死而代伋死者子壽又無子太子伋同母弟二人其一曰黔牟黔牟嘗代惠公爲君八年復去其二曰昭伯昭伯黔牟皆已前死故立昭伯子申爲戴公戴公卒復立其弟燬爲文公文公初立輕賦平罪身自勞與百姓同苦以收衛民十六年晉公子重耳過無禮十七年齊桓公卒二十五年文公卒子成公鄭立成公三年晉欲假道於衛救宋成公不許晉更從南河度救宋徵師於衛衛大夫欲許成公不肯大夫元咺攻成成出奔晉文公重耳伐衛分其地予宋討前過無禮及不救宋患也衛成公遂出奔陳二歲如周求入與晉文公會晉使人鳩衛成成公私於周主鳩令

薄得不死已而周爲請晉文公卒入之衛而誅元咺衛君瑕出犇七年晉文公卒十二年成公朝晉襄公十四年秦穆公卒二十六年齊邴歃弑其君懿公三十五年成公卒子穆公遯立穆公二年楚莊王伐陳殺夏徵舒三年楚莊王圍鄭鄭降復釋之十一年孫良夫救魯伐齊復得侵地穆公卒子定公臧立定公十二年卒子獻公衍立獻公十三年公令師曹教宮妾鼓琴妾不善曹笞之妾以幸惡曹於公公亦笞曹三百十八年獻公戒孫文子甯惠子食皆往日旰不召而去射鴻於囿二子從之公不釋射服與之言二子怒如宿孫文子子數侍公飲使師曹歌巧言之卒章師曹又怒公之嘗笞三百乃歌之欲以怒孫文子報衛獻公文子語蘧伯玉伯玉曰臣不知也遂攻出獻公獻公犇齊齊置衛獻公於聚邑孫文子甯惠子共立定公弟秋爲衛君是爲殤公殤公秋立封孫文子林父於宿十二年甯喜與孫林父爭寵相惡殤公使甯喜攻孫林父林父犇晉復求入故衛獻公獻公在齊齊景公聞之與衛獻公如晉求入晉爲伐衛誘與盟衛殤公會晉平公公執殤公與甯喜而復入衛獻公獻公亡在外十二年而入獻公後元年誅甯喜三年吳延陵季子使過衛見蘧伯玉史

鮪曰衛多君子其國無故過宿孫林父爲擊磬曰不樂音大悲使衛亂乃此矣是年獻公卒子襄公惡立襄公六年楚靈王會諸侯襄公稱病不往九年襄公卒初襄公有賤妾幸之有身夢有人謂曰我康叔也令若子必有衛名而子曰元妾怪之問孔成子成子曰康叔者衛祖也及生子男也以告襄公襄公曰天所置也名之曰元襄公夫人無子於是乃立元爲嗣是爲靈公靈公五年朝晉昭公六年楚公子棄疾弑靈王自立爲平王十一年火三十八年孔子來祿之如魯後有隙孔子去後復來三十九年太子蒯聵與靈公夫人南子有惡欲殺南子蒯聵與其徒戲陽遯謀朝使殺夫人戲陽後悔不果蒯聵數目之夫人覺之懼呼曰太子欲殺我靈公怒太子蒯聵犇宋已而之晉趙氏四十二年春靈公遊于郊令子郢僕郢靈公少子也字子南靈公怨太子出犇謂郢曰我將立若爲後郢對曰郢不足以辱社稷君更圖之夏靈公卒夫人命子郢爲太子曰此靈公命也郢曰亡人太子蒯聵之子輒在也不敢當於是衛乃以輒爲君是爲出公六月乙酉趙簡子欲入蒯聵乃令陽虎詐命衛十餘人衰絰歸簡子送蒯聵衛人聞之發兵擊蒯聵蒯聵不得入入宿而保衛人亦罷兵出

公輒四年齊田乞弑其君孺子八年齊鮑子弑其君悼公孔子自陳入衛九年孔文子問兵於仲尼仲尼不對其後魯迎仲尼仲尼反魯十二年初孔圉文子取太子蒯聵之姊生慚孔氏之豎渾良夫美好孔文子卒良夫通於慚母太子在宿慚母使良夫於太子太子與良夫言曰苟能入我國報子以乘軒免子三死毋所與與之盟許以慚母爲妻閏月良夫與太子入舍孔氏之外圃昏二人蒙衣而乘宦者羅御如孔氏孔氏之老嬾甯問之稱姻妾以告遂入適伯姬氏既食慚母杖戈而先太子與五人介輿猴從之伯姬劫慚於厠彊盟之遂劫以登臺嬾甯將飲酒炙未熟聞亂使告仲由召護駕乘車行爵食炙奉出公輒犇魯仲田將入遇子羔將出曰門已閉矣子路曰吾姑至矣子羔曰不及莫踐其難子路曰食焉不辟其難子羔遂出子路入及門公孫敢闖門曰毋入爲也子路曰是公孫也求利而逃其難由不然利其祿必救其患有使者出子路乃得入曰太子焉用孔慚雖殺之必或繼之且曰太子無勇若燔臺必舍孔叔太子聞之懼下石乞孟厲敵子路以戈擊之割纓子路曰君子死冠不免結纓而死孔子聞衛亂曰嗟乎柴也其來乎由也其死矣孔慚竟立太子蒯聵



是爲莊公莊公蒯聵者出公父也居外怨大夫莫迎立元年卽位欲盡誅大臣曰寡人居外久矣子亦嘗聞之乎羣臣欲作亂乃止二年魯孔丘卒三年莊公上城見戎州曰戎虜何爲是戎州病之十月戎州告趙簡子簡子圍衛十一月莊公出犇衛人立公子斑師爲衛君齊伐衛虜斑師更立公子起爲衛君衛君起元年衛石曼專逐其君起起犇齊衛出公輒自齊復歸立初出公立十二年亡亡在外四年復入出公後元年賞從亡者立二十一年卒出公季父黔攻出公子而自立是爲悼公悼公五年卒子敬公弗立敬公十九年卒子昭公糾立是時三晉彊衛如小侯屬之昭公六年公子亶弑之代立是爲懷公懷公十一年公子頹弑懷公而代立是爲愼公愼公父公子適適父敬公也愼公四十二年卒子聲公訓立聲公十一年卒子成侯遯立成侯十一年公孫鞅入秦十六年衛更貶號曰侯二十九年成侯卒子平侯立平侯八年卒子嗣君立嗣君五年更貶號曰君獨有濮陽四十二年卒子懷君立懷君三十一年朝魏魏囚殺懷君魏更立嗣君弟是爲元君元君爲魏壻故魏立之元君十四年秦拔魏東地秦初置東郡更徙衛野王縣而并濮陽爲東郡二十五年元君卒

子君角立君角九年秦并天下立爲始皇帝二十一年二世廢君角爲庶人衛絕祀

### 宋微子世家

史記

微子開者殷帝乙之首子而紂之庶兄也紂既立不明淫亂於政微子數諫紂不聽及祖伊以周西伯昌之修德滅阬阬國懼禍至以告紂紂曰我生不有命在天乎是何能爲於是微子度紂終不可諫欲死之及去未能自決乃問於太師少師曰殷不有治政不治四方我祖遂陳於上紂沈湎於酒婦人是用亂敗湯德於下殷既小大好草竊姦宄卿士師師非度皆有罪辜乃無維獲小民乃並興相爲敵讐今殷其典喪若涉水無津涯殷遂喪越至于今日太師少師我其發出往吾家保于喪今女無故告予顛躋如之何其太師若曰王子天篤下菑亡殷國乃毋畏畏不用老長今殷民乃陋淫神祇之祀今誠得治國國治身死不恨爲死終不得治不如去遂亡箕子者紂親戚也紂始爲象箸箕子歎曰彼爲象箸必爲玉楮爲楮則必思遠方珍怪之物而御之矣輿馬宮室之漸自此始不可振也紂爲淫泆箕子諫不聽人或曰可以去矣箕子曰爲人臣諫不聽而去是彰君之惡而自說於民吾不忍爲也乃被髮佯

狂而爲奴遂隱而鼓琴以自悲故傳之曰箕子操王子比干者亦紂之親戚也見箕子諫不聽而爲奴則曰君有過而不以死爭則百姓何辜乃直言諫紂紂怒曰吾聞聖人之心有七竅信有諸乎乃遂殺王子比干刳視其心微子曰父子有骨肉而臣主以義屬故父有過子三諫不聽則隨而號之人臣三諫不聽則其義可以去矣於是太師少師乃勸微子去遂行周武王伐紂克殷微子乃持其祭器造於軍門肉袒面縛左牽羊右把茅膝行而前以告於是武王乃釋微子復其位如故武王封紂子武庚祿父以續殷祀使管叔蔡叔傅相之武王既克殷訪問箕子武王曰於乎維天陰定下民相和其居我不知其常倫所序箕子對曰在昔鯀陞鴻水汨陳其五行帝乃震怒不從鴻範九等常倫所斲鯀則殛死禹乃嗣興天乃錫禹鴻範九等常倫所序初一日五行二曰五事三曰八政四曰五紀五曰皇極六曰三德七曰稽疑八曰庶徵九曰嚮用五福畏用六極五行一日水二曰火三曰木四曰金五曰土水曰潤下火曰炎上木曰曲直金曰從革土曰稼穡潤下作鹹炎上作苦曲直作酸從革作辛稼穡作甘五事一日貌二曰言三曰視四曰聽五曰思貌曰恭言曰從視曰明聽

曰聰思曰睿恭作肅從作治明作智聰作謀睿作聖八政一曰食二曰貨三曰祀四  
曰司空五曰司徒六曰司寇七曰賓八曰師五紀一曰歲二曰月三曰日四曰星辰  
五曰歷數皇極皇建其有極欽時五福用傳錫其庶民維時其庶民于女極錫女保  
極凡厥庶民母有淫朋人母有比德維皇作極凡厥庶民有猷有爲有守女則念之  
不協于極不離于咎皇則受之而安而色曰予所好德女則錫之福時人斯其維皇  
之極母侮繆寡而畏高明人之有能有爲使羞其行而國其昌凡厥正人既富方穀  
女不能使有好于而家時人斯其辜于其母好女雖錫之福其作女用咎母偏母頗  
遵王之義母有作好遵王之道母有作惡遵王之路母偏母黨王道蕩蕩母黨母偏  
王道平平母反母側王道正直會其有極歸其有極曰王極之傳言是夷是訓于帝  
其順凡厥庶民極之傳言是順是行以近天子之光曰天子作民父母以爲天下王  
三德一曰正直二曰剛克三曰柔克平康正直彊不友剛克內友柔克沈漸剛克高  
明柔克維辟作福維辟作威維辟玉食臣無有作福作威玉食臣有作福作威玉食  
其害于而家凶于而國人用側頗辟民用僭忒稽疑擇建立卜筮人乃命卜筮曰雨

曰濟曰涕曰霧曰克曰貞曰悔凡七卜五占之用二衍竇立時人爲卜筮三人占則從二人之言女則有大疑謀及女心謀及卿士謀及庶人謀及卜筮女則從龜從筮從卿士從庶民從是之謂大同而身其康彊而子孫其逢吉女則從龜從筮從卿士逆庶民逆吉卿士從龜從筮從女則逆庶民逆吉庶民從龜從筮從女則逆卿士逆吉女則從龜從筮逆卿士逆庶民逆作內吉作外凶龜筮共違于人用靜吉用作凶庶徵曰雨曰暘曰奧曰寒曰風曰時五者來備各以其序庶草繁庶一極備凶一極亡凶曰休徵曰肅時雨若曰治時暘若曰知時奧若曰謀時寒若曰聖時風若曰咎徵曰狂常雨若曰僭常暘若曰舒常奧若曰急常寒若曰霧常風若王眚維歲卿士維月師尹維日歲月日時毋易百穀用成治用明峻民用章家用平康日月歲時既易百穀用不成治用昏不明峻民用微家用不寧庶民維星星有好風星有好雨日月之行有冬有夏月之從星則以風雨五福一曰壽二曰富三曰康寧四曰攸好德五曰考終命六極一曰凶短折二曰疾三曰憂四曰貧五曰惡六曰弱於是武王乃封箕子於朝鮮而不臣也其後箕子朝周過故殷虛感宮室毀壞生禾黍箕子傷之

欲哭則不可欲泣爲其近婦人乃作麥秀之詩以歌詠之其詩曰麥秀漸漸兮禾黍  
油油彼狡僮兮不與我好兮所謂狡童者紂也殷民聞之皆爲流涕武王崩成王少  
周公旦代行政當國管蔡疑之乃與武庚作亂欲襲成王周公周公既承成王命誅  
武庚殺管叔放蔡叔乃命微子開代殷後奉其先祀作微子之命以申之國于宋微  
子故能仁賢乃代武庚故殷之餘民甚戴愛之微子開卒立其弟衍是爲微仲微仲  
卒子宋公稽立宋公稽卒子丁公申立丁公申卒子湣公共立湣公共卒弟煬公熙  
立煬公卽位湣公子鮒祀弑煬公而自立曰我當立是爲厲公厲公卒子釐公舉立  
釐公十七年周厲王出犇彘二十八年釐公卒子惠公覲立惠公四年周宣王卽位  
三十年惠公卒子哀公立哀公元年卒子戴公立戴公二十九年周幽王爲犬戎所  
殺秦始皇列爲諸侯三十四年戴公卒子武公司空立武公生女爲魯惠公夫人魯  
桓公十八年武公卒子宣公力立宣公有太子與夷十九年宣公病讓其弟和曰父  
死子繼兄死弟及天下通義也我其立和和亦三讓而受之宣公卒弟和立是爲穆  
公穆公九年病召大司馬孔父謂曰先君宣公舍太子與夷而立我我不敢忘我死

必立與夷也孔父曰羣臣皆願立公子馮穆公曰毋立馮吾不可以負宣公於是穆公使馮出居于鄭八月庚辰穆公卒兄宣公子與夷立是爲殤公君子聞之曰宋宣公可謂知人矣立其弟以成義然卒其子復享之殤公元年衛公子州吁弑其君完自立欲得諸侯使告於宋曰馮在鄭必爲亂可與我伐之宋許之與伐鄭至東門而還二年鄭伐宋以報東門之役其後諸侯數來侵伐九年大司馬孔父嘉妻好出道遇太宰華督督說目而觀之督利孔父妻乃使人宣言國中曰殤公卽位十年爾而十一戰民苦不堪皆孔父爲之我且殺孔父以寧民是歲魯弑其君隱公十年華督攻殺孔父取其妻殤公怒遂弑殤公而迎穆公子馮於鄭而立之是爲莊公莊公元年華督爲相九年執鄭之祭仲要以立突爲鄭君祭仲許竟立突十九年莊公卒子湣公捷立湣公七年齊桓公卽位九年宋水魯使臧文仲往弔水湣公自罪曰寡人不能事鬼神政不修故水臧文仲善此言此言乃公子子魚教湣公也十年夏宋伐魯戰於乘丘魯生虜宋南宮萬宋人請萬萬歸宋十一年秋湣公與南宮萬獵因博爭行湣公怒辱之曰始吾敬若今若魯虜也萬有力病此言遂以局殺湣公于蒙

澤大夫仇牧聞之以兵造公門萬搏牧牧齒著門闔死因殺太宰華督乃更立公子游爲君諸公子犇蕭公子禦說犇毫萬弟南宮牛將兵圍毫冬蕭及宋之諸公子共擊殺南宮牛弑宋新君游而立湣公弟禦說是爲桓公宋萬犇陳宋人請以賂陳陳人使婦人飲之醇酒以革裹之歸宋宋人醢萬也桓公二年諸侯伐宋至郊而去三年齊桓公始霸二十三年迎衛公子燬於齊立之是爲衛文公文公女弟爲桓公夫人秦穆公卽位三十年桓公病太子茲甫讓其庶兄目夷爲嗣桓公義太子意竟不聽三十一年春桓公卒太子茲甫立是爲襄公以其庶兄目夷爲相未葬而齊桓公會諸侯于葵丘襄公往會襄公七年宋地震星如雨與雨偕下六鵬退蜚風疾也八年齊桓公卒宋欲爲盟會十二年春宋襄公爲鹿上之盟以求諸侯於楚楚人許之公子目夷諫曰小國爭盟禍也不聽秋諸侯會宋公盟于孟目夷曰禍其在此乎君欲已甚何以堪之於是楚執宋襄公以伐宋冬會于亳以釋宋公子魚曰禍猶未也十三年夏宋伐鄭子魚曰禍在此矣秋楚伐宋以救鄭襄公將戰子魚諫曰天之弃商久矣不可冬十一月襄公與楚成王戰于泓楚人未濟目夷曰彼衆我寡及其未



濟擊之公不聽已濟未陳又曰可擊公曰待其已陳陳成宋人擊之宋師大敗襄公傷股國人皆怨公公曰君子不困人於阨不鼓不成列子魚曰兵以勝爲功何常言與必如公言卽奴事之爾又何戰爲楚成王已救鄭鄭享之去而取鄭二姬以歸叔瞻曰成王無禮其不沒乎爲禮卒於無別有以知其不遂霸也是年晉公子重耳過宋襄公以傷於楚欲得晉援厚禮重耳以馬二十乘十四年夏襄公病傷於泓而竟卒子成公王臣立成公元年晉文公卽位三年倍楚盟親晉以有德於文公也四年楚成王伐宋宋告急於晉五年晉文公救宋楚兵去九年晉文公卒十一年楚太子商臣弑其父成王代立十六年秦穆公卒十七年成公卒成公弟禦殺太子及大司馬公孫固而自立爲君宋人共殺君禦而立成公少子杵臼是爲昭公昭公四年宋敗長翟緣斯於長丘七年楚莊王卽位九年昭公無道國人不附昭公弟鮑革賢而下士先襄公夫人欲通於公子鮑不可乃助之施於國因大夫華元爲右師昭公出獵夫人王姬使衛伯攻殺昭公杵臼弟鮑革立是爲文公文公元年晉率諸侯伐宋責以弑君聞文公定立乃去二年昭公子因文公母弟須與武繆戴莊桓之族爲亂

文公盡誅之出武繆之族四年春鄭命楚伐宋宋使華元將鄭敗宋囚華元華元之將戰殺羊以食士其御羊羹不及故怨馳入鄭軍故宋師敗得囚華元宋以兵車百乘文馬四百疋贖華元未盡入華元亡歸宋十四年楚莊王圍鄭鄭伯降楚楚復釋之十六年楚使過宋宋有前仇執楚使九月楚莊王圍宋十七年楚以圍宋五月不解宋城中急無食華元乃夜私見楚將子反子反告莊王王問城中何如曰析骨而炊易子而食莊王曰誠哉言我軍亦有三日糧以信故遂罷兵去二十二年文公卒子共公瑕立始厚葬君子譏華元不臣矣共公九年華元善楚將子重又善晉將欒書兩盟晉楚十三年共公卒華元爲右師魚石爲左師司馬唐山攻殺太子肥欲殺華元華元犇晉魚石止之至河乃還誅唐山乃立共公少子成是爲平公平公三年楚共王拔宋之彭城以封宋左師魚石四年諸侯共誅魚石而歸彭城於宋三十五年楚公子圍弑其君自立爲靈王四十四年平公卒子元公佐立元公三年楚公子棄疾弑靈王自立爲平王八年宋火十年元公母信詐殺諸公子大夫華向氏作亂楚平王太子建來犇見諸華氏相攻亂建去如鄭十五年元公爲魯昭公避季氏居

外爲之求入魯行道卒子景公頭曼立景公十六年魯陽虎來奔已復去二十五年孔子過宋宋司馬桓魋惡之欲殺孔子孔子微服去三十年曹倍宋又倍晉宋伐曹晉不救遂滅曹有之三十六年齊田常弑簡公三十七年楚惠王滅陳熒惑守心心宋之分野也景公憂之司星子韋曰可移於相景公曰相吾之股肱曰可移於民景公曰君者待民曰可移於歲景公曰歲饑民困吾誰爲君子韋曰天高聽卑君有君人之言三熒惑宜有動於是候之果徙三度六十四年景公卒宋公子特攻殺太子而自立是爲昭公昭公者元公之曾庶孫也昭公父公孫糾糾父公子禚秦禚秦卽元公少子也景公殺昭公父糾故昭公怨殺太子而自立昭公四十七年卒子悼公購由立悼公八年卒子休公田立休公二十三年卒子辟公辟兵立辟公三年卒子剔成立剔成四十一年剔成弟偃攻襲剔成剔成敗犇齊偃自立爲宋君君偃十一年自立爲王東敗齊取五城南敗楚取地三百里西敗魏軍乃與齊魏爲敵國盛血以韋囊縣而射之命曰射天淫於酒婦人羣臣諫者輒射之於是諸侯皆曰桀宋宋其復爲紂所爲不可不誅告齊伐宋王偃立四十七年齊潛王與魏楚伐宋殺王偃

遂滅宋而三分其地